


雲南通志 二十九 六

陽明文庫圖書
一一一號
共三冊
經書院圖書館


新裝
5-86
ウ1



近衛本
5-86
21



1115217



序 藝文七

唐

近衛本

西南備邊錄序

失名

唐太和四年十月戊申制詔兵部侍郎臣德裕節
度劔南西川維蜀西控戎索南接蠻服昔在中葉
武尅不剛蝨賊內訌蛇豕荐食表撐裏拓猶懼侵
軼未陰綢戶莫急二邊於是先事候情并謀合智
料敵勢扼地險計軍實而備邊錄作焉卽十三卷
之簡見萬里外之情所以制勝無形銷患未萌也

茲不可無序夫破敵于一方其策易備敵于多方
其謀難朔方旣城薄伐于西文王其勤也儼然旣
攘鞠旅于南宣王之武也鉞芒瀉氣蠆穴潰堤智
慮不周捍防不密則疆場之虞不生所備而生所
玩吁可懼哉然山川阨塞非圖莫見兵財盈虛非
書莫著是故軍防有錄譔于天寶九州別錄上于
正元禦彘新錄奏于元和元振述安邊之策敬興
條備邊之失前英後傑帷籌幄畫詳已然之變忽
未動之憂寢薪爲安折柂爲固猷之不遠寇將生

心德裕身佩西陲之任得不爲南鄙慮乎方唐盛
際德威溥暢北縻突厥東懽遼海窮髮及景悉主
悉臣文恬武嬉喪羊于易吐彘開釁河隴失險締
從南詔協力謀我岷江飲馬倚爲元鋒井絡坤垠
我圍孔棘有守曰臯鑿青谿道要結蠻好犄鹿效
順纂集事狀爲卷十七質幣結轍聞戶誨盜戎膽
雖虻蠻旣始茅涇入成都如升虛邑唐之君臣日
旰食矣疇咨良翰矯失刷耻爰命德裕抗旌秉鉞
葺殘奮怯改紀其政乃建籌邊之樓凡險要與蠻

相入者圖之左與戎密邇者圖之右而部落饋餉靡不察乃立雄邊之軍其精兵曰南燕及連弩騎士曰飛星及突騎而農戰器械靡不飭大度孰制城以伏羲榮經孰控城以禦侮西山孰阨城以柔遠復邛峽關從越嵩治而蠻之齒寒怛謀納欵維州歸璧而彝之氣奪猶慮敵去而備弛也兵將糧械之數城鎮種落之名歲計經用之目講求利病輯爲一書諸郡故實外彙情狀臚分縷析燦如指掌搆立隄壘成以朱書總繪小圖標之首卷而第

四卷序維州本末尤悉書成于太和六襍迨會昌中秉國之鈞始奏上之觀諸文集猶有可考二邊方騷而金湯之二敵孔熾而霆雷之匪石晝沈幾曷克臻茲藏之禁嚴副在邊瑣日戒夕惕庶克有定大中而後惱憂好暇懷燕安之毒玩鷲擊之形河湟歸疆西顧無騎塙矣厲階之梗惟蠻爲甚餽糠及米繇劍而嶺乾符之季有臣雲虔自邕管涉川陸四十七程至善闡以南詔錄三卷獻于朝吁德裕之錄以蜀備蠻藩籬之寇也雲虔之錄以邕

雲南通志 卷之二十一
三
備壘則闖然入戶庭矣憂先于事事至而憂奚翅
銖石之差與據往鑿新不可不悉患於微眇也易
之蹇曰利西南必有六二匪躬之臣而後能濟蹇
難德裕以之按唐藝文志是錄列在兵書今館閣
書目存者一卷餘軼不存我思古人愛莫起之撫
陳編而三歎謹序

明

董莊愍死節威楚序

王奎

龍亡虎逝而群狐嗥風披雲靡而震霆作此可以

觀大人之變明治化之迹也按元史龍溪集紀天
曆初雲南中慶路鎮將敗狐叛遣兵攻威楚官吏
或逃或屈獨知事董文彥義不從賊銳聲詆罵賊
不忍聞截其耳以塞其口文彥嚼血唾賊罵不絕
聲賊怒裂而殉之明年敗狐伏誅憲司以事聞朝
廷嘉之謚曰莊愍旌其門官其子時中子斤臨安
時中爲文學掾一如集中言泣且請曰先父不幸
死賊手雖褒嘉于朝時中懼其事之荒湮也先生
以文章顯幸爲我序之嗚呼忠臣烈士何代無之

求之彝服會不多見昔安祿山以范陽反顏杲卿
死河北張巡許遠死睢陽雖武夫小卒皆知盡節
闔城皆然華夏忠義之習無怪也唐史列之於傳
植大義於後世者至矣敗狐之叛中慶大藩也威
楚大都也省府大臣不死之風紀執法不死之刺
史不死之知事一彝人耳食九品秩乃凜凜乎仗
大義樹大節寧死而不顧見理明而臨事不眩也
使天下之人皆若文彥則叛亂何繇而生哉予生
也後仕不先人不獲與太史著作之列而元史不

載莊愍死節事豈史闕歟抑在彝畧歟抑述史時
雲南未附不得聞歟以未附闕文君子固不能無
憾以在彝而畧則失之遠矣因爲述之於簡以補
史氏之闕

春園詩序

李夢陽

夫詩發之情乎聲氣其區乎正變者時乎夫詩言
志志有通塞則悲權以之二者小大之共由也至
其爲聲也則剛柔異而抑揚殊何也氣使之也是
故秦魏不貫調齊衛各擅節其區異也唐之詩最

李杜者方以北人也而張含者滇產也其爲詩杜何也夫張含者志非通也其春園之亂曰舊醅野客新蕨盤殮茲其情又何懽也夫鴈均也聲唳唳而秋雖雖而春非時使之然耶故聲時則常情時則遷常則正遷則變正則典變則激典則和激則憤故正之世二南鏘於房中雅頌鏗於廟庭而其變也風刺憂懼之音作而來儀率舞之奏亡矣於是考繁載吟伐檀有詠北風其涼之篇興而十畝之間之歌倡矣斯所謂恬塞棄通以懽祛悲者也夫大人尙兼君子耻獨故卷阿之章曰梧桐生矣于彼高岡鳳凰鳴矣于彼朝陽言士貴及時樹勳也夫沐劉杭三子者臺鎮之妙英也其和張含也弗塞之憐而頤懽之偕若是則南園公和其于時宜倍三子十也何也南園者考而傳者也

重觀滇海序

給事中 楊士雲 鶴慶

本朝聲教四訖稽古作程內簡臺史外列臬司觀風于天下一人大觀在上四方觀化于下非省方觀民何以設教嘉靖乙丑聚峯毛先生以臺史觀

滇維時中官肆虐罔過巨室封利罔幅戎心叵測
罔馭曰茲惟亂本不可長亟疏論狀咸得請大闡
罷鎮羣醜懃服迄于今賴之報命中傷左官壬寅
以僉臬再至再巡洱海攝詰戎兵維時楚甯久逸
難變陵德敝化難閒草竊潛作難弭甚而金沙可
達難於謀始曰茲亦惟亂本毋紐乃教民事必民
淫嚴斥候議請疏江圖永久餘風用殄畢棄咎亦
罔不咸賴升庵太史題重觀滇海張之鄉大夫士
歌之進予序之於乎觀之時義大矣觀之初六童

觀罔鑒趣順謂之童觀斯昧六二闕觀寡鑒從順
謂之闕觀斯狹六三觀我生自審行可謂之生觀
斯察六四觀國之光明習國儀謂之光觀斯有融
先生德兼三四應上近五故茲觀風上裨大觀下
裨觀化隼可射狐可獲戎可戒孚可革寇可禦大
川可涉觀民設教明哉熙哉滇職永利休哉可歌
已予聞在昔介軒王公澤州楊公觀滇有辭罔俾
二公專美西南又可歌已其諸觀陝與天下者咸
若是獨滇乎哉庸附群言之首

林臯漫興詩序

夏 誥 昆明

古之人進則著勲勞飭名檢以求不負所學退則居鄉善俗清修俟命陶情琴酒寄興林臯時發吟詠攄寫性真故其詩皆冲彝自適不負所養後之人則不然進則循時退多詭俗逐逐于聲色勢利內汨精神外封面目卽欲勉事吟咏率皆牽累惟予友龍德敷氏冲恬夙抱耿介素聞自乞養歸公府無轍跡雲山有逸蹤晦養深湛以故天趣悠揚無蹈厲無矯激求之古人在晉如陶淵明之冲澹

在唐如韋蘇州之清遠在宋如邵堯夫之擺脫今固不可得見矣德敷其亦有志于三君子乎何臭味之同也且也居則花卉滿庭遊則丘壑無礙閒則危坐醉則雅歌門無車馬之誼座皆金蘭之契心與詩詩與景俱化也予得其詩讀之因漫爲之序

皆山館文集序

莊祖誥

杜少陵有言文章千古事得失寸心知可謂洞晰文人之肺腑矣乃又曰作者殊列名豈浪垂擲何

不輕售才人聞譽若此然當是時拾遺諫草終不能敵遣興詩謫至以忠君愛國之熱腸一付諸殘山剩水爲點綴則文章蓋難言之矣直指朱公素以文名高海內卯辰之間不佞誥曾奉制舉義而膾炙之則見靡思弗靈靡胎弗脫一逞具凌雲之氣遂慨然想慕所爲古文詞恨未繇窺見一班耳洎公按滇日則首檄諸司百執若羣長吏最殿其功能而以愛君勤政一念著爲曆約之誓之警省數言直是瑞錦奇珍碎金賸馥真令吾屬欽承佩服不能已已及出皆山館刻相示則又翩飄粹朗恬雅高華汪宏浩渺之勢且洋洋大觀也斂室之綃耶龍宮之燭耶崑林之鼓耶藐姑射之霞耶黃河九折入海之流耶吾眩矣誠無以名狀之矣噫此猶是公令龍巖時語也環巖皆山嶙峋截業之槩爲天宮爲霞嶼日與大武歐寮諸峯相映帶誅茆結屋退食自公襟期曠磊旣謾謾如松下之風亦岷岷如山頭之石常以天下國家大議寄意於管侯子墨之間如闔微焚餘諸作故是奇勝卽其

一點一畫嬉笑罵詈盡成文章蓋借事表衷便足千古豈杜陵所謂騷人不見漢道盛斯者耶讀醉翁亭記者以爲兩文忠一時絕唱斯集也毋亦髣髴環滁皆山意乎記是描境中之人集自吐人中之意虛虛實實間各極其致矣况公螭頭諫草白筆霜飛頓令杜拾遺避三舍哉夫按敝綃然後知蜀錦之無光也窺龍燭然後知蠙珠之不媚也游崑林而後知瑜次之未晷也仰姑射而後知春雲之澹蕩望黃河而後知百川衆流之爲涓滴也昔者劉禹錫初見華山以爲此外無奇及見荆山以爲此外無秀繼遊池州登九華山然後悼前言之容易皆山也而見山者異昔余讀醉翁亭記亦作如是觀余茲愧矣余滋益矣

滇候記序

楊慎

遠遊子曰千里不同風百里不共雷日月之陰徑寸而移雨暘之地隔壟而分茲其細也本明太蒙之野戴斗戴日之城或日中而無影或深暝而見旭或銜燭龍以爲照或煮羊脾而已曙山川之隔

闕氣候之不齊其極也是以有測景之圭有書雲
之臺有相風之幌有候風之津海有星占河有括
象以此知其不齊也故曰不出戶知天下天下誠
難以不出戶知也非躬闕之其載籍夫九丘之書
志九州之異也佚而不傳周處作九州風土記宗
慄作荆楚歲時記至於巴蜀異志嶺表異錄皆是
物也余流放滇越溫暑毒草之地抄過從悟言之
適幽憂而屏居流離而闕時感其異候有殊中土
輒籍而記之豈欲妄意古人乎他冀萬一釋其棘
矜歸於氓明焚枯酌醴班荆坐茅與擊壤之老聚
沙之童晨夕話之亦可以代博奕之爲矣

雲南鄉試錄序

楊慎

聖天子嗣大歷服之十九年寔惟閩之一章入庚
子蒞首粵當三物賓興期雲南巡按御史某申命
甲嚴法癸葺試窠曷文軌業爰飭其故期不愆於
素乃以布政司某司調按察司某司鹽郡大夫若
支郡大夫邑郎官洎流末官咸慎選精遴昉局隸
事罔弗虔學官某輩若干人應聘以屆罔弗共闔

滇之較四十有二入毅之士二千有奇皆提學副使某所曉擇也先長夏回生淖禹湛警及初商應律啓霽升陽乃甲子鑠院御史蒞肅衆曰矢公矢慎乃遣此二矢昕有如日暝有如燭乃臚唱諸士而試之戊辰一之辛未二之甲戌三之題則紬簡刺之卷則分經閱之公簾以內司試者鑄之交交如也鯁鯁如也公簾以外司調司監者分職之魚魚如也雅雅如也御史又實臨內外而綱維之翼翼如也井井如也援簡其試之中得廿人鏤雕其文之優廿首爲雲南庚子科鄉試以獻某濫竽授簡拜手颺言曰大道散而有六經六經散而有諸子諸子之是非取裁於六經六經之刪修折衷乎聖道三代而上道見於事業而流行於文章三代以還道寓於文章而不純於事業故鄉舉里選取其事業矣敷奏明揚取其文章矣兩漢以經術對策取士六朝以品薦詞華甄人隋合南北始有科舉最盛于唐增光于宋而其得人之效視三代猶矣我太祖高皇帝重獎天衷再造人極掃舊元之

晦盲否塞復三代之純固惇龐日而月之星而辰之輝而倫之文而章之君師之道兼隆仁聖之事畢矣嘗伏讀科舉之詔矣易用程子傳朱子本義書從夏氏蔡氏兩傳詩采漢箋暨集傳春秋本三傳兼胡氏禮記則古註疏與陳皓集說裁訂自淵衷參采乎諸儒使孔孟復生亦無異論也又嘗觀先正首科之題辭矣曰初場在通經而明理次場在通古而贍辭末場在通今而知務上之涵養乾知大始下之承順坤作成物菁莪樸槲之化梓材

多士之興良有以也丹青既久而渝神化亦窮以變厥今士習何如哉其高者凌虛厲空師心去迹厭觀理之煩貪居敬之約漸近清談遂流禪學矣卑焉者則掇拾叢殘誦貫蒲魄陳陳相因辭不辯心紛紛競錄問則呿口此何異瞽矇誦詩闡寺傳令乎窮高者既如彼卑淪者又如此視漢唐諸儒且惡焉况三代之英乎聖祖制舉之美意舉賢求士之良規豈端使之然哉今皇上遠述唐虞近法聖祖屢下明詔銳意作新又必宗經必法古必崇

雅必黜浮菁莪之詩梓材之書復作于今日收濟
濟之士迺穆穆之衡行媿千古先諸士乎沐薰濡
化提耳命固是千年之期而一朝之遇也况爾滇
雲聖祖常有諭言曰氣厚風和君子道行之所爾
諸士子生其鄉邦久佩謨訓矣一人之身且有新
吾三日之士尚猶刮目矧曰涵泳已百七十載濟
濟數三五六經諸士曷哉今日之滇雲非昔日之
滇雲矣曷哉不以一第自滿而以三代之英自獻
某也願微榮靈假於諸士子僭書以俟

毛琢庵奏議序

楊慎

甲申七月之變左給諫毛君用成死焉都人士弔
哭若堵牆其子沂迎護旅轉經于途亦如之雖生
平於用成有榮辱分者皆罄辭致哀以此知物論
矣丁亥中春走始得一哭于寢丘沂手集其奏議
幾卷藏之冀得走序悲不聊閱追惟蚤歲識君于
李文正公門及君成進士在家大人選中迨今二
十餘年矣斯文久要之誼同事後死之責雖欲無
悲奚方而無悲古云死生亦大矣平居而駢處喬

步而葉拱塗人可以爲哲流蓄患悚其先詘僂嬰
其後不以事爲解以佗爲辭者衆乎黜矣用成言
若不出口而臨大節若此致命遂志其困也君子
走曩紬書史局多見君疏其論事利害卓乎不羣
犁然當于人心其甄別取與不貴苟同黨阿伐異
者斷斷然殊不介也獨立不懼其大過人也君
子嗚呼善其生者也所以善其死也今余于用成
也何贊毀耶昔之憤世立言者美人顏榮名余讀
而悲之彼豈誠善于道耶善人天地之紀其言者
天弗死地弗埋也奚徒顏榮名而已觀斯集也必
有夷然而嘆毅然而感者矣

試田圖籍序

尚書包見捷

萬曆戊午滇闈論秀會侍御潘公攬轡至綱紀其
事作人之效煥然改觀間者滇人士先後鱗集昆
明廉得其二迤道里疲露狀慨然興懷謂管子伯
者猶曰士首國之四民不可使雜處而令其言吮
其事亂故聖主處士必於燕閒誠慮之也比歲黔
士良病遠涉業稍營公田庶幾少瘳今每飯未嘗

不在泮河也方書俱在豈滇黔一體而二視之遂
一意節奢廩費裒鏹若干金購田若干畝約三稔
課輸租若干金以給全省應比諸士爰刻田之圖
籍用識不朽一日函書南浦問敘不佞不佞竊歎
公澄清萬里功績卓燦非一而此舉之大有造於
滇人士也語曰一歲樹穀百歲樹人以滇渺焉天
末徼聖朝道化翔洽士類蒸蒸羔鴈成羣制科之
額視昔浸加乃士丁風簷下筆陣詞鋒譬之於戰
鹿鳴鸚薦目之爲提浸假士不紛志於旅資有彙
征於泰茅皆作于公之醪續以賈其餘勇則其志
開而神王也夫然故公之養士爲造士愛人爲知
人其樹風聲於滇者意可謂宏遠矣乃滇人士宜
何如祈嚮以報公哉昔宋有饗士者登歌四章曰
山曰水曰鴻鴈曰松栢而蘇子瞻繹以勉士之動
欲難進靜欲及時爲學而志於得其道至其論稼
又惓惓于完地利識天時耕穫有度而津津稱古
人之大過人者在博觀而約取厚積而薄發要非
區區博一第明得志者至今讀其言凜凜爲俗學

之戒然則公之望我滇人士之得售者想亦子瞻之深意也夫千里比肩累世接踵士倘有意力田逢年乎宜益知勉學以無爲石田庶不負公矣

滇南修攘備考圖說序

楊芳

昔李德裕節度西川建樓籌邊圖其阨塞險要之處數召習邊事者指問之久而若親履其地周知其事故能走吐蕃卻南詔夜郎之屬願爲內臣譚者美其功余猶憾夫贊皇之所圖者乏輕便之利隘博大之觀也夫樓而繪之居而閱之按索勤矣

然攜之不可遇而隨也推之不可共而覽也守之不可世而傳也意文饒兀然直局於見耳大中丞陳公撫滇之三年四履大寧哀諸部所上輿地圖下執事劄劄之命曰修攘備考不佞承令辱首事得有言以先梓人蓋三復圖考而嘆治安之畧燦然指掌矣滇至我朝始列郡邑比內地高皇帝廓然一視兼復併露部荆所無第輿圖同列職方而孤懸西南隅若贅疣然君長號令指臂可使而強梗背約束者難運掉封永長蛇敗我王畧緬不悔

雲南通志 卷之二十九
禍藩籬撤而與敵至移守近地幸中丞往一大創
之緬稍折比而遙度者意異指殊若日緬不能爲
害毋苦勞天子人民爲信從旁之議與當局異憂
矣茲一二年來有陰與緬以必自救之嚮陽示我
有必不戰之勢西陲宴然無犬吠之警見謂緬無
它不知中丞默操其權固難以語諸人耳業已設
雄關八緬不可犯開屯田百千頃爲長久計緬且
辟易務而効質而又深惟廟勝之莫攘外必先修
內次第諸所表首內郡而州部而羈縻守捉使南
撫交北距蜀西天竺東黔陽封域之內析之則地
自爲圖圖各爲說總之則圖歸一說地約一圖其
間山川之分合形勢之險易風土之美惡利害之
重輕一披閱而孔明所不經章亥所未步者神馳
而心往焉兵食要機戰守方畧恢恢乎遊亦有餘
地矣夫尺幅之卷舒千里可通至便也片言之說
論億人可曉至博也一帙之縑素百世可傳至遠
也公之籌邊與李同而善用其籌又獨有得於繪
圖之外者若乃內修上策寓於圖而不盡於圖亦

雲南通志 卷之二十九
不泥之圖公自有神解當事者按圖而得公之解
緬可剪而朝食故地立復邊關不閉滇其世世無
患矣

本朝

諡忠錄序

范承勳

余重葺楊太史祠表其節義文章所以崇名教
也祠成慨然者久之思太史於滇爲寓公滇之
先賢古獻有明三百年豈無彪炳史冊可與太
史輝映千秋者閱滇志得諫垣昆明毛公諱玉
號琢庵者與太史同時同事廷杖先殞闕下是
誠太史知己也及數過太史祠憑弔之下以毛
氏詢諸土人指其別廬故址正在山麓水涯間
又復愴然者久之噫使毛公當日不死獲乞歸
爲碧嶢主人必且與太史脫屣塵外詩酒嘯歌
朝挹華頂之雲夕盪昆池之月則丹鉛遺錄唱
和更多詎非山間澤畔儼然屈原宋玉之同心
哉於戲燕帟羈魂何識哀牢之譴直城落魄空
含斃杖之悲弔同時而懷孤節因寓跡而溯雙

忠此二公者存歿一心安危一節任運數所遷
總以各遂千秋之不朽不必同也亦未必異也
而願廟祀未崇終泯泯無所表揚乎未幾其孫
生員毛翰持讞忠錄來乞言於余始知舊會請
祀鄉賢矣亦可以與太史相輝映而無憾矣且
其先世兩貞婦苦節撫孤劉爲公會祖母魏爲
公祖母忠貞萃於一門維風勵俗曷敢闕焉因
爲之表其節義文章俾滇人士知先賢古獻之
可法者雖不止毛公而可以與太史相輝映者
其惟毛公乎竊更有感焉古者卿大夫歿則君
命有司累其功德爲文以哀之曰讞今讞毛公
之忠爲之哀集而採錄者又太史也細讀太史
爲毛氏碧巖精舍記仍隱隱以辨物正名立論
余知太史讞毛公行自痛也抑知千古之下誰
復憑弔焉而并讞之者乎余所以始因太史而
得毛公旣因毛公而難已於太史也

碑

唐

南詔德化碑

西瀘令 鄭 回

恭聞清濁初分運陰陽而生萬物川嶽既列樹元首而定八方道治則中外寧政乖必風雅變我贊普鍾蒙國大詔性業合道智觀未萌隨世運機觀宜撫衆退不負德進不慙容者也王姓蒙字閣羅鳳大唐特進雲南王越國公開府儀同三司之長子也應靈傑秀含章挺生日負標奇龍文表貴始乎王在儲府道隆三善位卽重離不讀非聖之書嘗學字人之術撫軍屢聞成績監國每著家聲唐朝授右領軍衛大將軍兼陽瓜州刺史洎先詔與御史嚴正誨謀靜邊寇先王統軍打石橋城差詔與嚴正誨攻石和子父子分師兩殄兇醜加左領軍衛大將軍無何又與中使王承訓同破劔川忠績載揚賞延于嗣遷左金吾衛大將軍而官以材遷功由幹立朝廷照鑒委任兵權尋拜特進都知兵馬大將二河旣宅五詔已平南國止戈北朝分政而越析詔餘孽于贈特鐸稍騙瀘江結彼兇渠擾我邊鄙飛書遣將皆輒拒遣詔弱冠之年已負

英斷恨茲殘醜敢逆大隊固請自征志在掃平梟
于贈之頭傾伏藏之穴鐸稍盡獲實物並歸解君
父之憂靜邊隅之稜制使奏聞酬上柱國天寶七
載先王卽世皇上念功旌孝悌往撫存遣中使黎
敬義持節冊襲雲南王長男鳳迎異時年十歲以
天寶入朝授鴻臚少卿因冊襲次又加授上卿兼
陽瓜州刺史都知兵馬大將旣御厚眷思竭忠誠
子弟朝不絕書進獻府無餘月將謂君臣一德內
外無欺豈期奸佞亂常撫罪生變初節度章仇兼
瓊不量成敗妄奏是非遣越嶲都督竹靈倩置府
東巽通路安南賦重役繁政苛人弊破南寧州都
督巽通路歸王昆州刺史巽日進梨州刺史巽祺
求州巽守懿螺山大鬼王巽彥昌南寧州大鬼王
巽崇道等陷煞竹倩兼破安寧天恩降中使孫希
莊御史韓洽都督李宓等委先詔招討諸巽畏威
懷德再置安寧其李宓忘國家大計躡章仇詭蹤
務求進官榮宓阻扇東巽遂激崇道令煞歸王議
者紛紛人各有志王務遏亂萌思紹先績乃命大

將軍段忠國等與中使黎敬義都督李宓又赴安寧再和諸蠻而李宓矯偽居心尚行反間更令崇道謀煞日進東巒諸酋並皆驚恐日歸王崇道叔也日進弟也信彼讒構煞戮至親骨肉既自相屠天地之所不祐乃各興師召我同討李宓外形忠正佯假我郡兵內蘊奸欺妄陳我違背賴節度郭虛已仁鑿方表我無辜李宓尋被貶流崇道因而亡潰又越嵩都督張虔陀嘗任雲南別駕以其舊職風宜表奏請爲都督而反誣惑中禁職起亂階吐番是漢積讎遂與陰謀擬共滅我一也誠節王之庶弟以其不忠不孝貶在長沙而彼奏歸擬令間我二也崇道蔑盟構逆罪合誅夷而卻收錄與宿欲令讎我三也應與我惡者並授官榮與我好者咸遭抑屈務在下我四也築城收管繕甲練兵密欲襲我五也重科自直倍稅軍糧徵求無度務欲敵我六也于時馳表上陳屢申冤枉皇上照察降中使賈奇俊詳覆屬監臣無政事以賄成一信虔陀共掩天聽惡奏我將叛王乃仰天嘆曰嗟我

無事上蒼可鑒九重天子難承咫尺之顏萬里忠臣豈好邪之害卽差軍將楊羅顛等連表控告豈謂天高聽遠蠅點成瑕雖布腹心不蒙矜察管內會渠等皆曰主辱臣死我實當之自可齊心戮力致命全人安得知難不防坐招傾敗於此差大將軍王毗雙羅時等揚兵送檄問罪府城自秋畢冬故延時序尚佇王命冀雪事由豈意節度使鮮于仲通已統大軍取南谿路下大將軍李暉從會同路進安南都督王知進自步頭路入旣數道合勢不可守株乃宣號令誠師徒四面攻圍三軍齊奮先靈冥祐神炬助威天人協心軍群全拔虔陀飲醜寮庶出走王以爲惡止虔陀罪豈加衆舉城移置猶爲後圖卽便就安寧再申表懇城使王克昭執惑昧權繼遣拒請遣大將軍李克鐸等帥師伐之我直彼屈城破將亡而仲通大軍已至曲靖又差首領楊子芬拜雲南錄事三軍姜如之齎狀披雪往因張郛讒構遂令蕃漢生猜贊普今見觀纍浪寧或以衆相威或以利相導儻若蚌鷸交守

恐爲漁父所擒伏乞君存見予在得思失府城復
置幸容自新仲通殊不招承刳至江口我又切陳
丹款至于再三仲通拂諫棄親阻兵安忍吐發唯
言屠戮行使皆被詆呵仍前差將軍王天運帥領
驍雄自黔蒼山西欲腹背交襲於是具牲牢設壇
禱叩頭流血曰我自古及今爲漢不侵不叛之臣
今節度背好貪功欲致無上無君之討敢昭告於
皇天后土史祝盡詞東北稽首舉國痛切山川黯
然至誠感神風雨震霈遂宣言曰彼若納我猶吾
奇俊帥師再置姚府將軍賈瓘爲都督僉曰漢不
務德而以力爭若不速除恐爲後患遂差軍將王
兵各絕其糧道又差大將軍洪光乘等神州都知
兵馬使論綺里徐同圍府城信宿未踰破如拉朽
賈瓘面縛士卒全驅三年漢又命前雲南郡都督
兼侍御史李宓廣府節度何履光中使薩道懸遜
忽秦隴英豪兼安南子弟頓營隴坪廣布軍威乃
丹楫備修擬水陸俱進遂令軍將王樂寬等潛軍
襲造船之師伏屍遍毘舍之野李宓猶不量力進

通遼川時神州都知兵馬使論綺里徐來救已至
巴躋山我命大軍將段附克等內外相應競角競
衝彼弓不暇張亦不及發自日晦景紅塵翳天流
血成川積屍塞水三軍潰亂元帥沉江詔曰生雖
禍之始死乃怨之終豈顧前非而忘大禮遂收亾
將等屍祭而塋之以存恩舊五年范陽節度安祿
山竊據河洛開元帝出居江劔贊普差御史贊卽
羅于恙結齋勅書曰樹德務滋長去惡務除本越
舊會同謀多在我圖之此爲美也詔恭承上命卽

君也今不我納自吾備也隣軍之機非事之見

召卒伍擱然登陴謂左右曰夫至忠不可以無王
至孝不可以無家卽差首領楊利等於浪穹參吐
蕃御史論若贊御史通變察情分師入救時中丞
大軍出陳江口王審孤虛觀向背縱兵親擊大敗
彼師因命長男鳳迦異大將軍段全葛等於丘遷
和拒山後贊軍王天運懸首轅門中丞逃師夜遁
軍吏欲追之詔曰止君子不欲多上人况敢凌天
子乎旣而合謀曰小能勝大禍之胎親仁善鄰國

之寶遂遣男鐸傳舊大會望趙佺鄧楊傳磨計及子弟六十人齎重帛珍寶等物西朝獻凱屬贊普仁明重酬我勲効遂命宰相倚祥葉樂持金冠錦袍金寶帶金帳狀安扛傘鞍銀獸及器皿珂貝珠毯衣服馳馬牛羈等賜爲兄弟之國天寶十一載正月一日於鄧川冊詔爲贊普鍾南國大詔授長男鳳迦異大瑟瑟告身都知兵馬大將凡在官僚寵幸咸被山河約誓永固維城改年爲贊普鍾元年二年漢帝又命漢中郡太守司空襲禮內使賈

遣大軍將洪光乘杜羅盛段附克趙附于望羅遷王遷羅奉清平官趙佺鄧等統細于藩從昆明路及宰相倚祥葉樂節度尚檢贊同伐越嶲詔親帥太子潘圖逼會同越嶲固拒被僂會同請降無害子女玉帛百里塞途牛羊積儲一月館穀六年漢復置越嶲以楊庭璣爲都督兼固臺登贊普使來曰漢令更置越嶲作援昆明若不再除恐成蕞蔓旣舉奉明旨乃遣長男鳳迦異駐軍瀘水權事制宜令大軍將楊傳磨佺等與軍將欺急歷如數道

齊入越嶲再掃臺登滌除都督見擒兵士盡擄於
是揚兵叩部而漢將大奔廻旆昆明傾城稽顙可
謂紹家繼業世不乏賢昔十萬橫行七擒縱畧未
足多也爰有尋傳疇壤沃饒人物殷奏南通渤海
西近大秦開闢已來聲教所不及羲皇之後兵甲
所不加詔欲革之以衣冠化之以禮義十一年冬
親與寮佐兼總師徒刊木通道造舟爲梁耀以威
武喻以文辭款降者撫慰安居抵捍者繫頸盈貫
矜愚解縛擇勝置城裸形不討自來祁鮮望風而

至且安寧雄鎮諸爨要衝山對碧雞波環碣石鹽
池鞅掌利及群歡城邑綿延勢連戎燹乃置城監
用輯携離遠近因依間閭櫛比十二年冬詔候際
省方觀俗恤隱次昆川審形勢言山河可以作藩
屏川陸可以養人民十四年春命長男鳳迦異於
昆川置拓東城居二詔佐鎮撫於是威懾步頭恩
收曲靖頽告所及翕然俯從我王氣受冲和德音
覆育才出人右辨稱世雄高視則卓爾萬尋運籌
則決勝千里觀彙而動因利興功事協神衷有如

天啓故能攻城挫敵取勝如神以危易安轉禍爲
福紹開祖業弘覃王猷坐南面以稱孤統東偏而
作主然後修支習武官設百司列尊叙卑位分九
等闡三教賓四門陰陽序而日月不愆賞罰明而
奸邪屏跡通三才而制禮用六府以經邦信及豚
魚恩霑草木屺塞流潦高原爲稻黍之田疏決陂
池下隰樹園林之業易貧成富徙有之無家饒五
畝之桑國貯九年之廩蕩蕩之恩累沾蠢動珍帛
之惠徧及耆年設險防非憑險起堅城之固靈津

蠲疾重巖湧湯沐之泉越賤天馬生郊大利流波
濯錦西開尋傳祿郟出麗水之金北接陽山會川
收瑟瑟之寶南荒滄溟覆詔願爲外臣東饜悉歸
赤頭已成內境建都鎮塞銀生于黑背之鄉候隙
省方駕憇于洞庭之野蓋繇人傑地靈物華氣秀
者也於是犀象珍奇貢獻畢至東西南北烟塵不
飛遐邇無剽掠之虞黔首有鼓擊之泰乃能驪首
叩南平昨海表豈惟我鍾王之自致實賴我聖神
天地贊普德被無垠威加有截春雲布而萬物普

潤霜風下而四海颯秋故能取亂攻昧定京邑以
息民兼弱侮亾冊漢帝而繼好時清平官段忠國
段尋銓等咸曰有國而致理君王之美也有美而
無揚臣子之過也夫德以立功功以建業業成不
記後嗣何觀可以刊石勒碑志功頌德用傳不朽
俾達將來家世漢臣八王稱乎晉業鍾銘代襲百
世定於當朝生遇不天再罹衰世賴先君之遺德
汰求舊之鴻恩改委清平用兼耳目心懷吉甫愧
無贊於周詩志効奚斯願齊聲於魯頌紀功述績

寔曰鴻徽自顧下才敢題風烈其詞曰降祉自天
福流後嗣瑞應匪虛禎祥必信聖王分憂遐荒聲
振襲久傳封受符兼印兼瓊秉節貪榮構亂開路
安南攻殘西爨竹倩見屠官師潰散賴我先王懷
柔伏叛祚不乏賢先猷是繼郡守詭隨貶身返裔
禍連虔陀亂深豎嬖殃咎匪他途承自殪仲通制
節不詢長久徵兵海隅頓營江口矢心不納白刃
相守謀用不臧逃師夜走漢不務德而以力爭興
師命將置府層城三軍往討一舉而平百縛羣吏

馳獻天庭李宓總戎猶尋覆轍水戰陸攻援孤糧
絕勢屈謀窮軍殘身滅祭而葬之情繇故設贊普
仁明審知機變漢德方衰邊城絕援揮我兵戎攻
彼郡縣越駕有征會同無戰雄雄嫡嗣高名英烈
惟季惟忠乃明乃哲叩瀘一掃軍羣雙滅觀兵尋
傳舉國來賓巡幸東轡懷德歸仁碧海效祉金穴
薦珍人無常主惟賢是親土宇克開烟塵載寢鞍
擊梨坑輯熙羣品出入連城光揚衣錦業留萬代
之臺倉貯九年之廩明明贊普揚于之光赫赫我

王實賴之昌化及有土業著無疆河帶山礪地久
天長辨穉世雄才出人右信及豚魚潤深瓊玖德
以建功是謂不朽石以刊銘可長可久
元

平雲南碑

大學士
程文海

國家繼天立極日月所照罔有外內雲南秦漢郡
縣也負險弗庭乃憲朝踐祚之二年歲在壬子我
世祖聖德神功文武皇帝以介翁親王之重授鉞
專征秋九月出師冬十二月濟河明年春歷寧夏

夏四月出蕭關駐六盤八月絕洮踰吐蕃分軍爲三道禁殺掠焚廬舍先遣使大理招之道阻而還十月過大渡河上率勁騎繇中道先進十一月渡瀘所過望風款附再使招之至其國遇害十二月薄其都城倚點蒼山西洱海爲固國王段興智及其柄臣高泰祥背城出戰大敗又使招之三返弗聽下令攻之東西道兵亦至乃登點蒼臨視城中城中宵潰興智奔鄯闡追及泰祥於姚州俘斬以徇分兵畧地所向皆下惟鄯闡未附明年春留

大將兀良合解經畧之上振旅而還未幾拔鄯闡得興智以獻釋不殺進軍平烏蠻部落三十七攻交趾破其都收特磨溪洞三十六金齒白彝緬中蠻國皆相繼納款雲南平列爲郡縣凡總府三十七散府八州六十縣五十甸部寨六十一見戶百二十八萬七千七百五十三分隸諸道立行中書省於中慶以統之大德八年平章政事也速答兒建言所領雲南地居徼外歷世所不能臣先皇帝天戈一麾無思不服今其民衣被聖明同於方夏

幼長老少怡怡熙熙皆自慙其在陋非聖武不殺之恩不及此惟點蒼之山嘗駐驛焉若紀聖功刻石其上使臣民永永瞻仰於事爲宜中書以聞制曰可以命詞臣臣文海再拜稽首而言曰世祖皇帝之德大矣譬如天地之無不持載無不覆幬而生生之意恒寓於雪霜風雨寒暑變化之中物之蒙之者薰然而溫灑然而濯翕然而同靡然而順有不自知其然而然者故其功烈之崇基業之廣貫三靈而軼千古夫以大理之昏迷旅拒虐我使

人若奮其武怒俾無遺育可也而招徠綏輯終釋其王弗誅嗚呼微天地之德孰能與于斯乎今陛下建中和之政凡以繩祖武厚生民無所不用其極中外欽承無遠弗届是以藩方大臣於錢穀甲兵之外倦倦以光昭令德爲請其知爲政之本也已漢世宗從事西南彝天下爲之騷動蜀民咨怨喻之諄諄鑿池蒞習再駕而後取之其視今也孰愈穆王周行寓縣必皆有車轍馬跡焉初非疆理天下也而世猶誦之至今視跋履山川洒濯其民

而納於禮義之域孰愈彼碧雞金馬與夫黠蒼皆
其山之望者也漢使祭之唐季盟之夫各有所畏
焉耳今也鑄未始磨之崖紀無能名之績桓桓炳
炳與世無極豈惟足以震百夷榮千古其餘光所
被山川鬼神實嘉賴之嗚呼盛矣哉臣事先帝蚤
受眷知今復待罪禁林發揚蹈厲職也不敢以荒
落辭謹再拜稽首而系之以詩曰於皇惟元載地
統天大噫小噓日寒以暄粵西南陬水駛山崑風
霆流形氣交神州跋息蠕蠕勾萌鮮鮮谷飲巢居
燕及跼鳶繫誰之恩聖祖神孫武烈文謨瀚夜生
存既有典常被之服章我吏我民我工我商萬國
一家孰爲要荒黠蒼蒼禹跡堯牆井鉞參旗終
夜有光威不遠顏作善降祥嗟爾耄倪視此勿忘

賽平章德政碑

趙子元

榮祿大夫雲南諸路行中書省平章政事賽公平
烏孫國師之後早遇太祖功聞五朝政事舒徐德
量寬大至元甲戌帝以南方未定召公囑之曰雲
南勝地極在遐荒自朕親臨率兵歸附迄今後屬

二十餘年撫恤之心雖切而下民之志未安今欲
得人以革其弊公奉天子命鎮諸外藩以納速刺
丁月忽乃爲斷事官楊璉爲左右司郡中塔木丁
爲員外郎梁增侯瑞爲都事所司之土東接宋境
西距蒲甘北抵吐蕃南徧交趾地方千里者五總
隸一百餘州凡二十餘路皆公所攝是歲七月抵
大理下車風動神行詢父老諸生安國便民之要
中慶大理兩設提舉令王榮午趙子元充其職中
慶首建文廟歲祀於春秋二丁仍收置儒籍識者

度公之心皆爲學較之事似乎寬緩公臨事之始
而先之者何也殊不知國家政事典則綱紀法度
軍旅刑措之事未嘗不自文學始今公先其所當
爲而爲之使南方之人舉知風化公可謂得治之
本矣繇是省徭役招散亡恤鰥寡備水旱禮賢士
削冗官建屯田制楮幣設路食以待勞民薄征稅
以廣行旅饑寒者得以衣食流散者得以撫綏凡
興利除害之事知無不爲與夫建省堂築驛館導
水治橋輿市井皆候農隙悅以使民民忘其勞凡

結怨於已者公悉以恩待之當時號爲易治十二年冬羅槃甸蠻自昔聲教之所不及者據險恃愚屢逆使命公乃徂征薄於城下我師四圍其勢欲破調諸將曰力攻不如德降諸將曰蠻夷不可以仁義化乘勢而攻殄無遺育必無後顧之憂公曰不然我聖主好生惡殺之心臣下體而行之職也數日城果下諸酋長各齎金馬幣帛以貢公命僚佐郎中楊璉安諭以西餘城和泥諸部望風屈膝十三年秋遣使齎檄招誘廣南溪洞是時儂土貴

及左江李惟屏右江岑從威等二十人各執土物納款公以新降不受降者拜首再三僅受以領其意及歸濃賞厚祿以旌其勤是歲廣中降者八十餘州籍四十萬戶東招靖江南開廣道不勞一矢而安定十四年春蒲甘遣大將釋多羅伯副以裨將五人士卒象馬以萬計剽掠金齒飛書求救公命萬戶忽都總管段信直等釋圍而蒲兵始解自後蒲甘不敢犯風金齒得以安堵皆公之良計也初昆明池口塞水及城市大田廢棄正途壅抵公

命大理等處巡行勸農使張立道付二千役而央
之三年有成噫嘻公今之治南詔亦猶昔之治西
秦也長安之人會勒碑以記其德公之用心可謂
至矣經綸既緒凡有功於王事者公遣使聞奏朝
廷莫不稱旨擢阿魯與納速刺丁爲雲南諸路宣
慰使都元帥楊璉爲宣慰使副都元帥月忽反忽
休赤阿舍八失爲招討使愛魯爲宣撫使總管段
信直等特加恩賜張立道爲中慶總管各賜虎符
金銀符宣勅者二百餘人以旌其功吾嘗論名實
之辨而有感於公故公能開疆闢土於不毛而不
能勒勲於銅柱使南方之人感恩於肺腑而不能
繪像於公朝此公之所能者實也公之實跡已昭
著於宇宙雖紀之金石歌之聲詩未足以發明其
萬一而公之名雖三尺之童亦知之又何待予之
揄揚而後顯哉然國人不超甘棠之詠似有愧於
召公黃童不爲騎竹之迎豈無慙於郭伋吾儕小
人舍本逐末鈞名干譽祝公寧不愧耶邦人父老
感公之德銘之琬琰以示不忘銘曰公實在己公

名在人已既無憚人何足詢爲政以德澤民以仁
南方生齒親之若親遠人向化臣其未臣昔號難
治公來舉醇豐功偉蹟南詔西秦追之金石永示
無垠

明

黔寧昭靖王祠堂碑

王奎

王諱英字文英姓沐氏鳳陽之定遠人元季天下
難作王在童穉喪所怙恃時皇上龍飛鳳陽往拜
干門上奇而育之既長機敏過人數從征伐終日

侍側無戲色亦無惰容弘量萃恭出于天性上益
奇之壬寅授帳前都尉出鎮鎮江焯有聲績甲辰
除廣武衛親軍指揮軍府肅然尋加昭勇大將軍
廣信衛指揮使軍府益律戊申春正月上卽皇帝
位改元洪武既定鼎命王從征福建擒元平章陳
友定三月復王姓鎮建寧三郡三年陞鎮國將軍
僉大都督府事四年陞榮祿大夫同知大都督府
事時天下兵樞交壅治出聲生稱上意旨中宮尤
屬望焉九年乘傳繇陝西抵熙河布德澤康遠人

事有不便更張以聞明年副寧河王總大兵征蕃部西渡黃河畧川藏耀兵崑崙轉戰千里俘獲萬計班師論功封西平侯開國輔運推誠宣力武臣階仍榮祿大夫勲柱國食祿二千五百石賜鐵券勲在盟府若曰朕昔子汝無異汝父汝今世有茲爵守乃宗祧以賁乃祖父無忘朕命敬之哉又明年八月拜征西將軍將兵征西番降元萬戶乞失加三副使舒朶兒只阿烏都兒人卒二萬雜畜二十餘萬平朶甘納都七站地數千里十三年以陝

西兵征和林元國公脫火赤等畧以集乃渡黃河回賀蘭涉流沙偵報去穹廬五十里王分爲四翼自以驍勇衝其中堅銜枚夜薄其營脫火赤愛足全部皆降明年引兵出古北口襲公主山長寨平四郡過驢駒河獲知院李宣還京副征南將軍統兵征雲南不決十辰雲南底定夏王與征南分兵東平烏蠻餘寇諸部謂王師東下復叛彝孽二十餘萬圍雲南城幾不支王聞以銳師萬人馳救之寇拔營宵遁時曲靖永昌皆失守王次第復平之事

聞詔征南班師王留鎮二十一年春平摩沙勒斬首千餘級三月緬思任發以三十萬衆寇定邊東川廣西往往遙應之王率諸衛兵三萬禦之宛日會戰蠻用象王分軍隊下令日聞吾砲聲大衆齊入初風從賊來砲發風猛助順乘風縱砲象皆股慄三軍夾擊之聲震山谷殺其首將刀斯郎斯郎埋蠻師大奔斬獲萬餘人盡獲其象馬軍實思倫發遂附秋七月東川平冬十月廣西平誅者滿矣獻俘五千餘人明年平越叛阿資冬朝京師賜晏奉天殿賜金銀楮帛繪綵以萬計尋還鎮上諭曰汝在朕無西南之憂二十四年阿資復叛王親擊之有詔命王還滇以僉都督何福爲平羌將軍討之阿資來降秋遣使招八百八百入貢明年夏王薨于正寢軍民罷市巷哭計聞上哭之勵追封黔寧王諡昭靖王在鎮十年初內訌外攘人流卒亡內無宿儲外絕餉運王分軍墾田九十七萬畝且耕且戰招撫携貳敬賢納土不吝賚予民始知有生雖連歲用師而陽春煦育之意常寓于霜露冰

霰之中退邊冒閭皆覩天日山川草木相生懋豫
與嘉賴之其功德之盛古所未有也民彝念王不
置合辭請于朝建祠報可俾王之子今西平侯纂
其任從民望也又按祭法古之通祀者五曰法施
于民曰以死勤事王兼有之載祀百世此其肇歟
祠作于薨之後二年十月乙未成于明年六月己
卯凡爲楹若干行馬列戟不侈不踰遵憲章也旣
成享咸請紀于石以垂無極因作迎享送神之詩
俾歌以樂焉大明麗天萬國明赤符飛騰策六丁

惟王翊運天降精身薄日月騎斗衡坐天張弧掃
機槍助帝駟伐基隆平氣壓崑崙盪滄溟出入星
緯無畱行勁涉滇海縻長鯨長鯨旣殲波浪腥龍
蛇走陸殺氣橫噓陽吹陰孰敢嬰文經武緯光晶
熒手揭元會歸虞庭上騎箕尾爲列星帝錫侈封
王黔寧河山帶礪分漢盟堂堂遺像夾兩楹神光
夜夜飛爽靈胎蠻布瀉通杏宜琴麗颯沓從雨旌
倏焉如雲搏紫清八衝鏘然韻流鈴春秋報事垂
于齡

定遠忠敬王廟碑

王直

古之人臣有大勲勞於國者生則疏爵以貴之於其終也則必有廟祀之禮焉所以崇德而報功也然非子孫之賢而能備其制成其禮者蓋鮮矣我國家之臣之有大功者鳳陽沐氏其一也沐氏之先曰黔寧昭靖王早受太祖高皇帝罔極之恩長而奉命征伐功烈赫然著在西土於是封西平侯作鎮雲南既薨而進王爵享廟食長子春嗣侯薨而王繼之王諱晟字景茂自少聰悟過人博考諸書高皇帝甚重之命爲後軍都督僉事益祇勤不懈加授特進榮祿大夫左都督俾襲侯封仍殿南服王念彝性無常先王戡定之不易必有以大鎮撫之然後能讐伏其心而各有寧宇先是諸蠻逐麓川宣慰而分據其地乃請發兵討定焉正其封域而疆理之置木邦孟養孟定三府鎮沅威遠二州干崖潞江灣甸大侯者樂五長官司徵其貢賦有常數又置騰衝千戶所於潞江之西以臨之而諸彝莫敢不服太宗文皇帝卽位之初八百蠻酋

出寇掠爲邊患王曰是不可不治不治則將愈肆
卽以聞且發兵問罪而自率衆繼進及蒙自縣蠻
聞王來皆退走王督兵窮追獲其酋戮以徇上嘉
其勇決賜白金降璽書勞勉安南叛朝命征彝將
軍率師討之而以征彝副將軍印授王爲左副俾
率雲南四川諸軍分道而進王經野蒲伐山通道
先驅入安南奪猛烈棚華關隘築堡駐師以造舟
分遣諸將出宣光江口奪澳沕寺沙昇舟夜出洮
水引兵泝流鏖斬富良江自旦達暮賊因稍引卻

明旦將復戰王于令曰天兵伐叛當出萬全命盡
括軍中舟聯爲浮梁以濟師與大軍會合攻多邦
城柵破之遂擣東西都及盤灘困牧嚕江仙侶等
處所至如破竹賊不能支遂潰寇首黎季犛父子
窮蹙挈家屬走海上於是將佐皆集督率諸軍追
至日南州奇羅海口悉統擒械送京師安南平得
郡四十八縣百八十六戶三百十二萬五千九百
他物不可勝計還朝上以王功多賜號顯忠輔運
推誠宣力武臣特進榮祿大夫右柱國封黔國公

雲南通志 卷之二十一
食祿三千石賜詔券玉帶金弊命子孫世襲既大
晏上親製詩寵之還鎮是冬安南復叛推陳季擴
爲首阮帥鄧容副之上獨命王爲征彝將軍以兵
往伐師入其地季擴等懼遁又安海島王追至占
城境上擒送京師誅之既還富州蠻會頑不供賦
者累年有司亦請以命王王左右皆曰此易與爾
以兵急攻平其地可也王曰威服不如德服使人
以禍福諭之蠻感悅卽遣子謝罪京師而盡輸逋
賦蠻中帖然仁宗皇帝嗣位以王勲戚之賢而久

勞於外召至京師命兼太傳待之禮益隆佩以征
南將軍印遣還王頓首辭讓上曰朕託卿鎮靜一
方此豈爲卿重哉宣宗皇帝及太上皇繼位所以
褒賜皆特厚正統初會川黎溪及馬龍他卽甸諸
蠻相繼作亂王皆命弟都督昂往平之及麓川思
任發及侵掠騰衝南甸諭之不下事聞命王率兵
致討師至潞江王諭諸將曰兵以謀勝今逼瘴月
豈用武之時然衆已集若賊畏威服罪則當爲請
於朝復諭之不從王乃命弟景及都督方政以兵

進然尤以敬慎爲戒王整兵未發政等夜渡江破賊柵斬首三千餘級政乘勝獨進遇伏力戰死時春已半王慮璋發非利遂旋師將駐金齒會有勅令還鎮息兵俟時而動至楚雄疾作勢且甚謂弟昂曰吾父子兄弟受朝廷恩大矣吾不能報爾素忠謹其勉率子孫篤盡臣道以無負國家又曰逆賊逋誅而偏將不返吾甚恨之爾毋忘此寇言訖而逝王文武忠孝克繼先王令緒而在鎮既久敷布天子仁義之澤以綏靖一方凡其言行施於父子兄弟賓友僚佐之間未嘗違乎道德隆位重祿好賢容衆記人之善忘人之過蠻彝干法不忍加誅若用兵行師非遇有罪不輕戮一人信賞必罰威行惠施是以將士用命所向有功至於講武事修戎器理屯田治城戍勤恤民隱興利去害建學立師以教導其人使歸於善尤孳孳不倦公事之暇手不釋卷進退從容有典有則凜然仁人君子之風蓋所謂悅禮樂而敦詩書者也至於薨人無貴賤愚良莫不哀慕正統四年三月十八日也享

年七十有二計聞上震悼罷朝恩恤尤厚追封定遠王謚忠敬而命子斌襲封黔國公弟都督昂總其軍昂薨斌仍出鎮雲南請於朝曰先臣紹臣大父遺烈受爵命膺綏靜之寄效征伐之勞思竭力成功以報殊遇而未克如志今蒙追錫王爵加以美謚寔與臣先大父同此莫大之恩也臣願如先大父立廟供祀享以彰上賜而畢臣志詔曰可於是作廟於昭靖廟旁制度儀觀之盛足以致其孝經始於景泰元年八月初三日而以景泰二年十月十五日訖工既備物行禮而告諸廟矣將勒文以紀其成而黔國公謝世上念沐氏世勲且有世澤於雲南而黔國子幼以今都督璘賢可以任繼述詔佩征南印仍總諸軍鎮茲土蓋都督昂之孫王之從孫黔國從子也深惟廟碑未建何以彰王之功德而成黔國之志乃因金齒儒學教授余毅來京師屬予文予惟聖王之制廟祀以報功德之臣蓋欲與國咸休厚之至也王之令德豐功世濟其美廟而祀之蓋宜矣國家有億萬年太平之慶

王亦享無窮之祀奚可無文以著不朽故爲序次
其事而系以銘俾刻焉銘曰天佑聖明篤生賢輔
四征不庭混一海宇遂開雲南昭靖之功師武用
宣以啓王封世臣大家譽望赫奕忠敬繼之克纘
戎績弗被炎荒瘴癘之區近悅遠懷固有不孚太
宗烈烈南交致伐風行草偃左將之傑乃執其渠
至於海隅再涉鯨波以訖天誅夙夜匪躬用熙帝
載位與時升業已久大高牙巨纛作鎮茲邦山川
遐遐千里相望皇闡大猷綸命時至惠綏撫摩惟

一其視乃寢干戈乃正典常以此仁愛馴彼暴強
蠻或不恭敢肆無道緩其彌雍恢我文告饑則有
食寒則有衣是孰使然敷政其宜相維先世匹休
儷美仁義忠孝允作臣軌何天弗遺亟殞將星哀
此下人雨涕曷勝當宁悼嗟追錫顯爵加以美諡
先王是若作廟巍巍昭靖焉依命服煒煌穆穆令
儀春殷秋高以享以祀鼓鐘旣設復有牢醴王之
格斯子孫之思亦軫民艱降福孔怡麗牲之碑藁
彼貞石載德有文垂耀無極蟠螭在滇穹龜負之

後千萬年永永弗隳

定遠王神道碑

明大學士楊士奇

王諱晟字景茂自少氣宇闊厚聰悟過人高皇帝
重之旣冠授後軍都督僉事陞授左都督時惠襄
繼昭靖鎮雲南薨王嗣封西平侯仍鎮雲南王承
父兄之後秉誠殫慮益弘遠圖先是麓川不靖王
適主奏發兵平之太宗皇帝臨御之三年八百蠻
酋侵邊王先後追擒其酋誅之四年安南叛命王
佩征彝副將軍印率雲南兵分道進討寇首遠遁
王追至日南州俘獲無遺械送京師安南平六年
春入朝封黔國公賜詔券玉帶金幣上親製詩褒
嘉還鎮雲南十七年富州蠻酋通賊不入命王討
之王使人諭以禍福蠻遣子詣京師謝罪悉償所
逋仁宗重王勲德命佩征南將軍印正統三年麓
川思任發擾邊諭之不下乃命弟昂及都督方正
等率兵前進乘夜渡江破賊柵斬首三千餘級獲
象三十餘政奮勇獨進賊伏兵四發政力戰死之
王曰是雖偏將失利固吾總帥之過旋師將駐金

齒昔再舉會有旨命還鎮王至楚雄以疾薨計至
京上爲之輟朝賜恤典追封定遠王諡忠敬夫人
臣生有茂勲死有榮名無愧于銘矣乃爲之銘曰
天啓皇明于淮之右配天與地篤生帝后二聖至
仁作民父母心存萬方包舍徧覆矧孤在里靡攸
怙恃二聖矜惻曰其予子鞠之誨之勞劬備周以
長以成有偉才猷帝有恩言爾復爾氏懋乃樹立
萃乃先祀嗚呼昭靖盛德豐功皎日之誠持孝與
忠嗚呼忠敬纘乃烈考維孝之執維忠之蹈往綴
滇人幾五十年率考之行敷帝之恩俾食俸永免
其寒饑重學崇師導之尊卑平其政令時其作止
人戴惠慈淪骨浹髓有或弗慧以諭以誨游誨弗
悛式劉以戒交人悖兇披猖爲狂遣天毒氓軼我
邊疆奉詔出師往天討桓桓疾馳雷驅電掃富
良飛渡如履坦途兩師窮追縛寇海隅解縱脅從
宣布教條爰整師旅凱歌歸朝飲至策勲上公錫
爵嘉寵元臣龍章輝灼滇人之思瞻望旆旌帝不
忘遠申命南行祇事五朝鞠躬小心奉國忘家志

如堅金寸棘未剪躬不寧處過自偏裨予躬引咎
終於王事德善孔多顯顯萃褒千歲弗磨沐氏子
孫奕奕象賢篤忠與孝永光其傳

太師武僖公神道碑

謝綬

公諱琮字廷方姓沐氏其先鳳陽定遠人曾太父
諱英從我太祖皇帝起兵定天干積功至西平侯
追封黔寧王太父諱晟嗣侯爵以功進黔國公加
太傅追封定遠王父諱斌嗣公爵充總兵官征南
討軍鎮雲南母梅氏贈黔國太夫人公生未晬父

喪時從兄璘繇都督同知總戎繼鎮雲南撫公友
愛篤至無何璘卒朝廷以公尚幼又命璘弟瓚嗣
兄職鎮雲南公遂得委己於學日有所進成化乙
酉甫冠入朝襲父爵夙夜惟謹憲廟寵眷有加丁
亥命還雲南如祖考故事公自到鎮痛刮磨豪習
勤於涖政五鼓卽起視事公退不入私寢冠帶終
日精覈簿書事無壅滯每修貢進表文必焚香遣
使敬肅遇聖旦歲節行禮如在上前朔望謁孔子
廟畢退坐明倫堂令諸生進講誘掖獎勵或修學宮

繪聖賢像飾祭器樂器給學田展解額凡可以作
興土類者無所不用其心至於惠鰥寡除貧暴尤
汲汲焉嘗奉勅督理軍儲謂邊方所恃者在兵兵
所養在食遂銳意屯田修治水利不數年田無荒
蕪庾有充積間值雨暘愆期懇禱輒應農隙則訓
練士卒振揚威武要路增置堡哨設兵守之盜賊
以息邊夷執贄來見一無所受必加賞犒而諭令
恪守王度諸夷懾服甲午交人至邊欲假道窺覘
虛實公通知其詐遂絕之日命各彝方固守以俟

交人知我有備乃遣使詣闕謝過戊戌尋甸土官
安晟卒其弟爭襲職廣西土官昂貴暴虐其民弗
堪公悉寘諸典刑奏革土官俱設流官治之土人
以安自是屢發兵征石屏攻鐵索箐赤石崖蕎甸
襲取南窩蒲賊莽丘掃定馬隆麗江劔川永寧羅
雄諸彝之爲民患者又添設大羅衛賓川州以爲
保障壬寅偕都憲程公琮往撫猛密所過秋毫無
擾或以平猛密策獻者公斥之曰自征麓川以來
軍民困憊極矣吾寧招徠以德不忍地方復罹兵

革之苦聞者趨之卒致彝會聽撫邊方帖然錄功
上請朝廷有白金文綺盔甲之賜加授公太子太
傅以崇獎之弘治改元戊申今上卽位念公久鎮
外藩上下咸宜又遣使賜白金文綺一日夙興盥
櫛衣冠坐堂上得風疾遽卒丙辰九月七日也公
生長動閥端慎有守穎敏過人苞苴不敢及門精
通武經諸書知用兵之法凡命將出師授以成算
所向有功平居孳孳嗜學手不釋卷于陰陽卜筮
星命之術亦皆究心詩歌樂府隨意所到富麗可

觀性至孝恒痛早孤事母竭盡子職及卒哭泣悲
哀弔客不忍聞待族姻有恩御下寬而有制度量
汪洋喜怒不形勢位已極戒滿思危兢兢業業待
人和氣滿容人喜樂就視人之善若己之善人有
困乏不顧有無輒傾囊濟之不吝喜近儒生時與
講論前言往行至忠義事慨然有嚮慕意若涉悖
亂卽義形於色識者方以遠大期之而遽止於斯
惜哉公生景泰庚午閏正月十三日春秋四十有
七以右叅將錦衣都指揮誠之子崑爲後鎮巡重

臣具以聞上震悼輟視朝一日贈特進光祿大夫
右柱國太師諡武僖命禮部論祭者十六東宮諸
王皆賜祭給驛歸其喪工部營葬復以雲南重鎮
遂從所請命崑就鎮紹爵繼守其地始獲遣官奉
公之喪歸江寧以己未年四月八日葬于長泰北
鄉祖塋之側初公生百鳥喧集卒之夕星隕光芒
亘天將葬塋前掘有石人其亦異哉未幾嗣公卽
以雲南巡撫都御史張公誥所述公事狀緘書走
幣介監察御史王君璟戶部主事王君應奎來請
文刻神道之碑予昔長藩司于彼知公履歷加詳
故不辭而書之銘曰桓桓武僖爲時名臣蚤承世
勲奉職以勤作鎮南土百彝安堵一有弗馴卽戡
以武天子曰都褒章誕敷宮傳有加寵賚寔殊交
人懷詐覘我虛寔公遂絕之外侮莫入蠢爾猛密
跳梁于邊公撫以德不以兵連人有弗給公則濟
之民有無告公則庇之惟才罔匹惟德有容是宜
永壽僅幾五旬是宜有續乃止其身事聞當宁測
然與悼祀不可缺爲公立後卹典駢蕃絕無僅有

光賁九原公其不朽

海口修濬碑

楊慎

譙允南巴蜀志云滇池之水出盤龍江亦名積波凡九十九竇滙爲昆明池其水乍深廣乍淺狹有如倒流故名曰滇池漢武帝欲開越雋昆明開有此池先於長安鑿池象之以習水戰是也今其名迹可覆悉如志言而漢唐歷宋叛服叵恒屢闔復塞焉迨明大一統百七十年九州同軌四海一家荒服之區化比畿甸矣昆明池近在雲南治城之外環而列城者州以安寧昆陽晉寧縣昆明呈貢歸化皆邊昆池土人亦稱曰海在昆陽地名曰海口實此池之咽噙盈涸因之水旱係焉濱海澤田或遇涔滂之歲浮則沒管利葉澹淡徒飲鳴鴉弘治中巡撫都御史應城陳公金始爲開濬之役有記勒於碑嗣是歲一興役謂之小修正德間都御史安福王公懋中副使崑山史公良佐繼之始相子河乃嘉靖戊申至庚戌大雨洽旬水大至盤盪激而成窟消汕濶而爲阜則石龍阻流而成硤黃

泥填淤而象鞭海田無秋矣澤暉及滇之仕宦歸
田者日率陳子兩臺于是巡撫都御史吳興頤公
應祥巡按御史莆田林公應箕總戎都督古濠沐
公朝弼集議于藩臬諸司躬往閱視維時南主節
節東作未起乃檄命雲南府屬各官凡二十人有
差經始己酉十有一月望後三日癸未是時來庀
役者夫僅七千餘二十五日庚寅裁肇工子河至
十有二月庚戌捐子河成其驅水大壩工繁未愒
乃先築少壩于子河故堤二十四日己未爲土人
星回節少壩成乃暨休百工越今歲庚戌十日乙
亥而庀役丁夫至者滿萬分委諸末職偕手競作
乃濬大河斲石龍潭創灑子河南日平定鋪至於
白沙河又至於白塔村又至於耐穰又至於新村
再至於大河南堤之新村再至於北岸之沙耐村
各以石緻川濬而濂窳其中爲洩水之壩板九座
壩各存水窻俾礫漂沙不衝塞焉其驅水大壩
成于仲春下旬乙卯乃併啓少壩而空黃泥灘復
自茶卜墩下匯子河故濬新築院壩編篁析符囊

石壞壤如蜀之湔堰昇於蛇籠之制以埽網落波若黃河輒灘嫩堰法蓋其禪欄障汜迺穀樵道自耙齒山場沙水引入子河以蠲黃泥灘之患辭計始漢厥以逮石龍壩以丈算者三千二百有餘落成以三月己卯大壩礪焉放流下安寧富民而濱海環滇者澤口出海心凸矣風回漣漪並靈河九里之潤月墮清泚無濁涇五斗之泥綠薄青葇若踴躍而來白沙丹疇狀奮迅而出是役也允如前記所云不一勞者不永逸不暫費者不永寧嗣是則歲之小修可免匪惟濱海得佃其田仿其力環海衛所州縣皆譏有息肩之慶矣役成當有樂石之缺以垂久遠爾

雲南平諸彝碑

御史 趙汝濂 太和

兵部尚書都察院右都御史兼理軍務紹興呂公開府雲南之又明年為嘉靖丙寅土酋鳳繼祖以武定叛刼殺自恣惡猷薰偏公召羣公而諭之曰賊祖黷亂國經往者務為姑息以致諸彝倣倣漸不可長於是奏聞天子降旨俞允命至之日主餉

督兵各奉其職戎器既備師徒既簡禡纛滇池分
哨而進列陣如雲呼聲動地逢賊於武定我師奮
勇衝突虜營矢鋒雨集砲聲雷鉤百里之內原草
爲赤公乃恟于元戎叅于臺史躬蒞大軍親壓敵
境藩臬大僚矢謨先後文武闔師闔如虓虎熊罷
十萬縱橫膠轄兵鋒筍束行伍篋密飛鳥不過蟻
蟻不通賊乃計窮奔逸泳江入蜀衆謂賊既過江
地涉別省茫茫林箐無跡可攻力排羣議定策造
舟羽檄星馳戒令速發憲臣聳聽將士誓死金炮

掀天旌旗蔽日履險如夷直趨姜堡招徠嚮導圖
寫地形望影揣情知賊不遠公運籌遙授警戒軍
中將士翻然抖搜介冑是夜果有二千餘賊衝劫
官營我師有備擒斬百餘大呼追逐墜崖落澗者
無算遂乘勝尾賊至會里寨公又飛檄指示幾微
恐有伏賊道旁乘隙比軍入葛可山賊果有伏我
軍先覺遂大破之直檣蒲桃村燬賊營千餘間斬
伐林箐一十三處繇是刮野掃地莽翳如濯鬼無
隱跡物無遁形四面夾擊不容綫鏹逆賊繼祖與

惡黨卅大才阿方等一時授首先是繼祖之黨姚
安則有欽鈞易門則有王一新首尾相應將爲禍
階公以通幽洞冥窮神觀化之力早知其然用兵
方半卽縛姚鈞兵功初成隨斬一新四兇旣除諸
彝膽落餘黨降者釋之復業凱歌而旋萬姓擁迎
山川草木蔚有佳氣奏捷上聞飲至論功粵稽往
事元江興師無成而罷東川用武竟非我功遂使
氈裘生心狂彝攘臂殆非所以示天下也我公蒞
止申明國法誅削羣兇不一而足甲子之夏斬僭
號二賊于昆陽秋斬奚本等三賊于祿納冬擒者
索于新化州乙丑誅虜遮於尋甸昔之蜂屯蝟集
者旣一掃而空乃今深根固蒂者又一戰而拔自
此當寧無南顧之憂揆之武侯在漢勲著南征今
日駿功誠不多讓昔周宣之世方叔元老克壯其
猷詩人歌功乃列於雅而我公希有之績歌詠未
作非甚闕典歟瀛與闔郡文武官屬縉紳士人采
撫實跡會衆合詞撰詩一通勒石於點蒼山庶垂
警于無窮以俟太史氏之采錄云詩曰天挺哲人

加志窮民職大司馬不私其身位高任重夙夜惟
寅曰此南服寇攘與鄰聖人在上四彝來賓乃爾
小醜敢云不臣爰登其罪爰整其旅彼兇潛號何
如腐鼠一擒雙孽無煩再舉其時伊何孟夏載暑
是歲之秋楚雄告憂蟪斧蝟蜂掩縣乘州會不逾
時亦既剪劉沅寒之節有承載啞一麾斃之遂傾
其穴乙丑之年羣盜蟬聯禍延尋甸一郡騷然運
籌得當弓不張絃以俘其醜弔此顛連我公王佐
皇風是播視金如土賤貨猶唾除兇剪亂風掃電
過奈何頑會不知悔禍罪釁滔天海山非大公用
震怒歷告羣僚是決不悛合覆其巢爾整師徒爾
備弓刀載爾糧糗忠蓋是昭歲臨丙寅夾鍾之月
馮燾滇池公秉其鉞紀律嚴明颺火奮越旌旗臘
臘誓師喋喋雄風燹燹駭電雷軍威所吞千里
震懼既與寇逢衝擊先登怒厲激發騰起雷騰矢
鋒簇兩戟流星羽騎奕奕戰象稜稜聲動天地
響破岡陵賊魄既褫莫敢回視扶傷而東泳江潛
寄我乃造舟直窮其地彼會既藏我師如鷺越歷

再旬檢蒐畢至賊員萬死奮其蟲臂欲當我車千
骸並棄殪彼二會獻馘於轅大憝既除餘兇雞豚
俘釣於姚斬新易門西南頑梗獮無垠洞見千
里一翳不存天威遠屆國勢斯尊往昔征彝半途
而散綱紀爲弛彝乃屢叛古昔出師孔明在漢天
威七擒廟謨神算千年誰追我公繼之通幽觀化
神算無遺重泉匪敖九地非疑凡所指授動中機
宜聿成峻功奚啻六奇我公體道文章之師我公
遠猷虎臣之儀允文允武千載一時揆古無讓可

無詠詩列郡安枕人孰不思吾儕土著桑梓於斯
勒詞山石永鎮諸彝

大理八蜡廟碑

李元陽

夫五穀者人之司命先王制爲蜡祭以報穀也其
神八故曰八蜡一曰先嗇神農也二曰司嗇后稷
也三曰農田峻也此聖神開穀之原者也其曰郵
表曠曰水防曰水墉此利於穀所當謹者也曰貓
虎以祛豕鼠曰昆蟲以息蝨賊此害於穀所當拔
者也蓋莫不有神以司之建亥之月致祭以報萬

物息老休農又各宴會其祝曰土及其宅水歸其壑昆蟲無作草木歸其澤其樂則歛幽頌擊土鼓是爲蜡也昔者子貢觀於蜡曰一國之人皆若狂未知其樂孔子曰百日之勞一日之澤非爾所知也故順成之方其蜡乃通謹宴會之財也今兩河關陝山之東西皆有蜡廟獨南中闕如嘉靖辛酉郡丞江公蒞止大理謂人曰吾昔爲滋陽令蓋見諸郡邑皆有八蜡廟焉對者曰茲典其有待乎夫事無倡罔濟滇之有蜡其自公始乎會歲饑米價騰湧未遑營作丐者二千餘人公乃募民之有餘穀者數百家使以次施濟施者無大費而丐者全活君子以謂損有餘補不足天之道也公又謂賑不可爲常欲米價常平其惟社倉乎遂以贖緩買穀貯之令民間主其糴糴不足又取岸沙之可耕者履畝升科以益之明年彭公以提刑憲使分巡金滄謂郡丞曰事神治人其道互用吾觀子之賑而倉也知子有裕民之志矣盍爲八蜡廟以祈年乎丞曰宿願也遂上下原隰選地於北郭浮屠之

原鳩工伐木輦石陶甃糾胥吏之惰者得十九人權量之欺者三十許人俾量罪具材作廟以睹焉郡之縉紳相賀曰治人者食於人治於人者食人謂其不能兼也今食於人而思所以食人詩曰彼君子兮不素餐今其斯之謂與分巡名謹三山人郡丞名應昂攸縣人

巡撫鄒公靖寇安民碑

朱逸民 太和

萬曆元年巡撫雲南兵部侍郎兼都御史關中蘭谷鄒公奉命勦除翼寇公恪恭祇懼閉閣思繹以

謂雲南賊寇西有鐵索赤石崖東有僕刺怙險負固戕害生靈在昔置衛以防之設營以戍之然皆無效又監司以董之然隨定隨叛迄無成功豈皆律有關歟抑威權弗專之故也今日之事非身任之而誰任乃集在位監司而告之曰聖人在上萬方有衆罔敢有肆厥志乃小彝弗靖兇釁滋張人民生業罔能自保及今弗底天罰後將何極惟執事大夫匡予之不逮諸大夫曰敢不黽勉以從事令於是密調兵糧指屬所往十月辛未公單騎遂

行道不避人郵驛之吏不知爲公所過悄然不動
一草直升赤石差出賊巢之背然飛檄分兵如動
於九天之上莫測其機維時飭戎憲副則新都湯
君仰紀功僉憲則上海屠君寬也十二月壬午公
躬擐甲胄禡纛嶺顛斬賊魁於旗下金鼓嘈噴上
聞於天旌旗紛繽下蟠於地壯士凜以爭先戎卒
憤而競起轟轟隱隱若轉石之墜高崖硠硠磕磕
如激水之投深谷矢鋒雨集砲聲雨鎗金沙之江
波濤起立林莽之箐飛火燭天伏崖窟者焚骨縱

橫投江流者漂屍蔽浪崖寨壁立陟之無從賊有
儲食恃以爲固公令將吏密求水道而斷之賊多
枕粟而死於是因糧於敵遂息負輓之勞冬十二
月丁卯賊旣平矣尙存餘糧資我版築乃設戍守
乃作城垣乃建署守乃作杠梁二百年梟獍之境
一變而爲耕耨之場矣春二月丁未公復單騎東
行直擣僕獍之界駐阿迷州因地設謀躬率將吏
當死不避見危而進一切弛張折衝悉與西征相
似而象陣兵力動軼幾先士馬皆有騰風躍雲之

氣不五旬日而百里內彝寇盡淨矣維時飭戎則
憲副西克張君文淵紀功則憲副晉江林君一心
主餉則大叅上海張君仲謙也初公之誓師也申
訓有曰人爲萬物之靈彝亦人也以無教而驕恣
得罪於天在法無赦今雖多方殄殲若撫鷲鴟弗
使傷無辜以昭帝德時乃有功汝弗祗承法亦無
赦汝其念哉嗚呼斯誓也仁人之言也故揮鉞之
下恆存不忍人之心生生殺殺惟法是循功峻而
不矜事險而無咎一時布政左使成都桂君嘉孝

叅議錢唐馮君子京嘉興卜君相憲副長樂陳君
洙僉憲彭澤畢君天能雞澤田君應弼諸大夫動
靜雖殊莫不各以其職先後從事奏凱之日節應
中呂告於山川飲至論功以聞於天子往稽趙克
國在漢先零猖狂帥師往攻料敵制勝遂克西戎
楊子雲作頌以美之以今較之公於克國未足多
讓而歌咏不作將爲闕典是以不揆蒙陋轉括耳
目之所覩記撰詞一篇以備太史氏之采錄且示
諸彝永以爲戒云其詞曰聖人御極憫此生靈爰

命卿佐維國之楨視此南服時靡有爭何物豕豕
乃于我兵肆陳帝聽興師徂征龍盾鳳旂山摧海
傾甲士雲集颺動天聲賊膽既破東西震驚百羊
集寇一朝以平氣殺鬱翳豁然朗清地同再造人
乃更生維茲賊土毒於蛇虎屢征不克憚破勁弩
我公英武談笑揮塵俘馘如神成於一鼓公立朝
堂請斬佞臣以斬佞手加彼頑民勢如摧枯孰敢
不馴尾大不掉鎮臣逞暴公能援山力為帝告舉
而擲之寘於他壤以靖四方孰敢有傲公無町畦

四海為家規模廓落渾渾無涯政舉大綱萬目無
差文武才節眾口非誇駢駢四牡六轡在手凱歌
而旋桓桓糾糾赤芾桓圭行當公右播之聲詩用
傳弗朽

本朝

重建靈應禪寺碑

布政 田啓光

自古帝王肇造區宇天人既已感應川嶽自為
効靈觀諸載籍燦然可考滇池雖處天末實西
南一重鎮山川廟祀東有金馬之神按滇乘周

時天竺國阿育王三子長曰福邦次曰弘慈季曰至德王有神馬惟見王金轡始受控御三子互爭乃縱馬命得者與之王愛季子以金轡授至德追至滇池獲之於此山麓遂化爲神屢著靈異雨暘疾苦祈禱輒應後至蒙氏時稱其神曰景帝血食千年卽漢遣王褒所致祭者也古有神祠元明間拓爲梵刹度僧祝釐名曰靈應禪寺其寺左挹昆池澄波靜練右來陞嶺疊嶂流青遠望碧雞山環接太華羅漢進耳諸峯皆畫屏羅列於前憑欄近眺則城郭川原烟村雨樹凝蒼鋪翠如在几席間相傳金馬朝暉爲滇南勝景云康熙二十年春

皇威震疊

大師進討吳逆餘孽余承乏內院忝預謨謀時平寇大將軍固山貝子駐軍山岡夜夢金馬騰驤盈日而敗賊於此山下殲戮幾無噍類卒之其黨內潰開城納款兵無血刃市肆不驚坐復舊疆孰非神陰翊我

皇朝之驗歟但

大兵雲集寺不免於傾廢神祀未

爰再見夢於固山貝子故於班師也倡施工資命僧重建其寺奉佛祀神復奉綏遠將軍總督部院蔡毓榮巡撫都察院王繼文暨驛鹽道郭廷弼督學道鄒嶧共爲布金用勦盛事余時蒙恩擢任藩牧自惟祀典復興職守宜先特捐俸督僧書定庀材鳩工經始于壬戌之春落成于甲子之夏堂殿廊舍雲會香厨次第就緒佛像神儀晨鐘暮鼓積漸莊嚴且丹碧輝煌輪奐一新而勝景依然在目矣夫清淨無爲者佛也聰明正直者神也溯厥要歸則以度衆福民爲本今茲山以神著寺以神崇福善禍淫之權誠求默應之理昭然不爽矧神既能護國而衛民人詎可不報功而崇德哉所願後此之大人君子繼此志於不衰則神自永祚於

皇朝而景星慶雲時雨和風叠見於

盛世矣未可與他蘭若之興修同日而並論也於是勒諸貞珉而爲之銘曰金馬來東靈應花宮衛民護國香火斯崇天兵討罪神夢潛通助順

殲逆陰有其功重新宇殿永振鼓鐘千秋萬世
景仰高風

表

唐

賀破吐蕃表

權德輿

伏以聲教所被遐邇大同蠢茲西戎尙有遺類或
犯亭鄣且稽靈誅陛下睿算無窮天威遠震以彝
裔感恩之衆佐藩隅制勝之臣地取以多方累獻
捷事皆前定必稟聖謨斬將塞旗出于料外堅城

便地盡落殼中通荒服會朝之途絕餘孽窺覲之
隙奉威懷之命以律而滅兼彝夏之師在和而克
此皆陛下神武潛運妖氛永清由是成擒自當盡
敵臣等謬當樞近媿乏廟謨幸覩成功不勝大慶

請築羅城禦南詔表

高駢

臣聞仗鉞擁旄顯受專征之寄殿邦守土必尊共
理之規冀勵節以輸忠須興利而除害伏以臣當
道山河雖嶮城壘未寧秦張儀收蜀之時已曾版
築隋楊秀守藩之日亦更增修堅牢雖壯于一隅

周匝不過于八里自咸通十年以後兩遭蠻寇攻圍數萬戶人填咽共處池泉皆竭熱氣相蒸其苦可哀斯弊可恤臣前年赴任之日纔過劍門料蠻賊奔逃不敢回顧先遣走馬入府放出城內戶人莫不懽呼稱見蕪息臣今欲與民防患爲國遠圖廣築羅城以示雄閫將謀永逸豈憚暫勞臣深受國恩實思忠盡儻允所奏乞宣付宰臣僉議

又築羅城成表

節度使 高 駢

西川境邑南詔比鄰頻遭蠻蜒之侵凌益以墻垣之湫隘兼是戎兵同行剽劫賊路不能控扼軍營罕習干戈遂使蒸黎枉遭塗炭臣初到統押便與經營更議遠圖以防後患嚴設武備廣築羅城遂乃相度地形揣摩物力不思費耗只繫安危趣十縣之人丁抽入州之將較分其地界受以城基運土囊而子來持石杵而雲集金湯旣設鐵甕如堅控地道之莫能徒云入寇縱雲梯之強立無計登陴白露屋凌空躋攀莫及青城山對峙形勢不如覆瓦烟青發磚苔碧縱蠻再至無計重圖皆仗陛

下之睿謀使微臣之創制

檄

漢

開越嶲諭巴蜀檄

中郎將司馬相如

告巴蜀太守蠻彝自擅不討之日久矣時侵犯邊境勞士大夫陛下即位存撫天下安集中國然後興師出兵北伐遠征單于駭怖交臂受事屈膝請和康居西域重譯納貢稽顙來享移師東指闔越相誅右弔番禺太子入朝南籙之君西燹之長常

效貢職不敢惰怠延頸舉踵喁喁然皆向風慕義欲爲臣妾道里遙遠山川阻深不能自致夫不順者已誅而爲善者未賞故遣中郎將往賓之發巴蜀之士各五百人以奉幣帛衛使者不然靡有兵革之事戰鬪之患今聞其乃發軍興制驚懼子弟憂患長老郡又擅爲轉粟運輸皆非陛下之意也當行者或亡逃自賊殺亦非人臣之節也夫邊郡之士聞烽舉燧燔皆擣弓而馳荷兵而走流汗相屬惟恐居後觸白刃流矢議不還顧計不旋踵

人懷怒心如報私讎彼豈樂死惡生非編列之民而與巴蜀異生哉計深慮遠急國家之難而樂盡人臣之道也故有剖符之封折珪而爵位爲通侯處列東第終則遺顯號於後世傳土地於子孫行事甚忠敬居位甚安逸名聲施於無窮功烈著而不滅是以賢人君子肝腦塗中原膏液潤野草而不辭也今奉幣役至南彝卽自賊殺或亡逃抵誅身死無名諡爲至愚恥及父母爲天下笑人之度量相越豈不遠哉然此非獨行者之罪也父兄之教不先子弟之率不謹寡廉鮮恥而俗不長厚也其被刑戮不亦宜乎陛下患使者有司之若彼悼不肖愚民之如此故遣信使曉諭百姓以發卒之事因數之以不忠死亡之罪讓三老孝悌以不教誨之過方今田時重煩百姓已親見近縣恐遠所谿谷山澤之民不遍聞檄到亟下縣道使咸喻陛下之意無忽

蜀漢

答益州渠帥雍闓檄

永昌太守

呂凱

天降喪亂奸雄乘釁天下切齒萬里悲悼臣妾大小莫不思竭筋力肝腦塗地以除國難伏惟將軍世受漢恩以爲當躬聚黨衆率先啓行上以報國家下不負先人書功竹帛遺名千載何期臣僕吳越背本就末乎昔舜勤民事隕於蒼梧書籍嘉之流聲無窮崩於江浦何足可悲文武受命成王乃平先帝龍興海內望風宰臣聰睿自天降康而將軍不覩盛衰之紀成敗之符譬如野火在原蹈履河冰火滅冰消將何所依附曩者將軍先君雍侯造怨而封竇融知興歸志世祖皆流名後葉世歌其美今諸葛丞相英才挺出深覩未萌受遺託孤翊贊季興與衆無忌錄功忘瑕將軍若能翻然改圖易跡更步古人不難追鄙土何足宰哉蓋聞楚國不恭齊相是責夫差僭號晉人不長况臣於非主誰肯歸之耶竊惟古義臣無越境之交是以前後有來無往重承告示發憤忘食故畧陳所愚惟將軍察焉

牒

唐

回雲南牒

高駢

我大唐聖皇帝德配二儀光齊兩曜仁霑動植聖
役神龍煦萬國若青天養此民同赤子東鄰若水
西屆流沙北通陰山南抵銅柱莫不貢琛而納賚
航海而梯山請混車書願爲臣妾是知卑微螢耀
不敢並於太陽齷齪蹄泔焉能踵於神驥且自九
彝八狄七戎六蠻雖居要荒盡遵中國縱外彝驕
倨豈中國等倫且以矍矍之飛騰不離溝瀆欲追

鸞鳳之羽翼擬接標霄雲南項者求合六詔併爲
一藩與開道途得接邛蜀賜書習讀降使交歡禮
待情深招延意厚傳周公之禮樂習孔子之詩書
片言旣知大恩合報忽窮兵再犯朗寧重陷交趾
兩俘邛蜀一劫黔巫城池皆爲灰燼士庶盡爲幽
冤轉恣胥襟罔知俊華吞越雋之舊地圍相如之
故城凌犯不休貪殘轉甚昔交趾都護不閑理兵
朗寧元戎未解誅寇受以侵欺容其殘暴某比者
親征海裔克復龍編駕三千之師剿十萬之寇南

定縣全軍陷沒如乾鎮疋馬不回羅和一空嘉寧
俱盡贊衛段首遷斬首騎將麻光亮亡軀李善龍
面縛軍前張詮生擒陣上沉白衣歿命之衆如赤
日消冰殺朱弩佉苴之軍若紅爐焰雪諾眉就戮
恩縉自裁董譯龍之恚惶范昵些之窘沮江橋則
盡底焚燒采筏則從頭覆沒波封瓦解扶耶大墮
容易誅鋤若高原之縱燎等閒撲滅如順坂之走
丸收復城池掃殄妖孽仗睿謀之果斷資神術而
追擒掩韓信滅趙之功吞樂毅定齊之策其於勝
負詔國同知昨日來鎮西川移從汶水仗節單車
大開城門放出人物固無疑阻直擬誅鋤前詔王遣
張棟成等楊言和好身纔入境兵已繼來侵欺大
國煢惑元戎戮僕之儀須依古典已軍令處置詔
國前後俘獲約十萬人今獨送杜驥妻言是沒落
杜驥守職本在安南城陷驅行故非沒落星霜半
代桎梏幾年李氏偷生空令返國杜驥蚤歿不得
還鄉今則訓練蕃兵指揮漢將鐵衣十萬甲馬五
千邕交合從黔蜀齊進昔時漢相有七擒七縱之

功今日唐臣蘊百戰百勝之術勲名須立國史永
書且杜驥官銜李瑤門地不是親近但王室疎宗
天枝遠派而已李氏並詔國木夾並差人押領進
送朝廷是故牒

代高駢回雲南牒

胡曾

牒前件木夾萬里離南一朝至北開緘捧讀辭藻
煥然獎飾過多欣慰何極實以乍同邊鎮繞到藩
籬且按此朝之舊儀未委彼國之新制不知鶴拓
惟認苴咩尚呼南詔之佳名豈見大朝之美號要

從微耗且是所宜伏承驃信王化風行君德雲被
雕題屈膝馭舌折腰卉服來庭毳裘入貢蓋以深
明豹略精究龍韜波伏西天草偃南土者然侵軼
我華夏無乃不可乎將謂我皇帝有所負於彼邦
邊臣有所負於彼國慮彼直我曲獲罪於天是陳
木夾申懷用貯榮報及披廻示已見事根止於囚
繫使人放歸彼國始乎小怨終此深讐吞噬我朗
寧虔劉我交趾取我越雋犯我益州若報東門乃
及再四夫物居中者尊也處外者卑也是以衆星

拱之北辰百谷趨之東海天地尚不能違而况於人乎我國家居天之心宅地之腹四方八表莫不輻湊亦猶北辰之與東海也誠知土地山河歸於有德雖云有德亦須相時苟無其時安可妄動明公博識多聞豈不見仲尼乎仲尼之聖踰堯舜顏子之賢過夔龍六合茫茫無立錐之地者蓋無其時也適使仲尼生於秦末乘胡亥之亂用顏回閔損爲宰相子路冉有領將軍子貢宰我克行人子夏言偃典書檄雖六合鼎沸可期月而定也當此

之時劉項只可都頭韓彭不過部將耳聖人雖有帝天下之德而無帝天下之時終不妄動及子路欲使門人爲臣以爲欺天乎及自歎曰鳳鳥不至河不出圖吾已矣夫止于負手曳杖逍遙倚門告終而已王莽不識天時符堅不知曆數安恃強富爭帝乾坤莽以百萬銳師來襲後漢光武以五千之衆破於昆陽堅以六十萬精兵寇于東晉謝玄以八千之卒敗于壽春豈不爲欺天罔地所致者也國富兵強何足恃也周王杖策于岐山漢祖脫

褐于泗水我高祖起自隴州蓋明公只知其一未
知其二見其形未知其兆也今與明公陳之望審
參焉昔周王承公劉之德遇殷紂之暴剝剔孕婦
塗炭生靈剖賢人之心斷朝涉之脛三分天下而
二歸周文王率諸侯而朝之至武王觀兵孟津八
百諸侯不期而會尚曰彼有人焉未可圖也退歸
修德觀乎聖人去就豈容易哉及微子去比干剖
箕子奴民不聊生皇天厭之國人棄之武王方援
旗誓衆一舉而滅紂者蓋天奪殷而與周也我皇
方宵衣旰食肩堯踵舜父事三老兄友百僚推赤
心於比干腹中懸白日於微子頭上諸侯合德百
姓歡心天下有人聖如周王家有姬旦戶生呂望
者乎漢祖承帝堯之德遇秦皇無道併吞六國恃
宇宙一家焚燒詩書坑滅賢哲築長城於紫塞造
阿房於皇州鬼母哭蛇人臣指鹿民不聊生皇天
厭之國人棄之是以陳勝一呼天下響應漢祖西
入五星都聚者蓋天奪秦而與漢也我皇帝方崇
詩書任賢哲卑宮室卹黔黎野無歌鳳之人朝有

問牛之傑天下有人英如漢祖家有韓信戶生張
良者乎我高祖承玄元之德遇隋煬荒淫徭役不
均徵歛無度竭民生之財產爲巡幸之資糧虎噬
羣賢猿蒸庶毋浮沉遼海疏鑿汴河今年東征明
年西伐民不聊生皇天厭之國人棄之是以我高
祖應天順地奄有四海者蓋天奪隋而與唐也我
皇方淡薄聲色杜絕巡游夢卜宰輔倚注藩屏思
成垂拱惡習干戈皇天方贊國人方歡天下有人
雄如唐祖家有敬德戶生玄齡者乎僕雖自絳紗

素就黃石旣探師律亦識兵機奉詔鎮壓三巴撫
安百姓思敦禮樂耻用干戈每傷虞芮之爭田念
姬周之讓路苟不獲已卽須訓戎且蜀地濶數千
里郡列五十城戶口至多士卒之衆可以揮汗成
雨吐氣成雲蓋緣從前元戎皆是儒者有珠見機
而作但守昇平之元規雖分常憂不教民戰是以
彼國得以深入無備故也僕示之以三令教之以
八陣鼓聲而進鉦動而退甘與之共苦與之均義
等墳箎情猶瓜葛悅禮樂而敦詩書務耕桑而聚

穀帛使家藏甲冑戶貯干戈賞罰並行公私共貫
既識三畧便可七擒不唯喝倒不周亦可劈開太
華况彼國自長慶已來搔擾益部殺人之父孤人
之子掠人之妻鬻人之夫焚人之廬舍使人暴露
剪人之桑麻使人寒凍蜀人怨恨痛入骨髓僕乘
其衆怒之勢示其暴怨之門况抱雞搏狸不誅人
教乳犬敵虎自是物情既仗宗廟之威靈兼統萃
夏之精銳若乘流縱棹下坂推車豈勞心哉僕官
是宰衡位當侯伯披堅執銳雖則未曾濟河焚舟
平生所貯彼國將帥之強弱邦國之盈虛坐可酌
量何煩詢誘且六合之外舟車不至聖人不言彼
國在聖人不言之鄉舟車不及之地縱主上英哲
人臣俊乂亦猶燭龍銜耀只可照於一方春雷振
聲不能過於百里天與不取談何容易夫天有五
賊見之者昌彼國縱曉六韜未嫻五賊而欲泥封
函谷水灌晉陽何其謬哉五賊者夏桀張羅殷湯
祝網是以仁而賊不仁也殷紂剖生人周文堊枯
骨是以德而賊不德也齊國厚徵薄貸魯國厚貸

薄徵是以恩而賊不恩也項羽殺義帝漢高祖舉
哀是以義而賊不義也陳後主驕奢隋文帝恭儉
是以道而賊不道也能行五賊兼曉六韜方可奪
人山河傾人社稷我朝未有五失而彼國徒自陸
梁以此推之興亡可鑒何勞遠離庭戶始識安危
久習韜鈴方明勝負而妄要姑息不務通和回示
荒唐一何乖戾罔念孔顏之知命翻效莽堅之覆
車交趾喪亡可知人事新都失律足見天時若望
降尊便希抗禮但百谷不趨東海衆星不拱北辰
則不可議也苟未如是則不可改圖昔管仲入周
不受上卿之禮蘓武在北無虧中國之儀事有前
規固難更易况小不事大春秋所誅若彼直我曲
恐招天殃旣彼傲我謙何患神怒見已訓齊士卒
調集糗糧或玉露垂槐金風動柀建鼓數里命車
指南涉雋弔民渡瀘會臘繼齊魯之夾谷紹秦趙
之澠池便是行人豈遺佳策皇帝聖旨已具前緘
奉聞臣下不復多談恐乖忠告謹牒

書

漢

開西南彝難蜀父老書

司馬相如

漢興七十有八載德茂存乎六世威武紛紜湛恩
汪濊羣生霑濡洋溢乎方外於是乃命使西征隨
流而攘風之所被罔不披靡因朝冉從驪定笮存
邛畧斯榆舉苞蒲結軌還轅東鄉將報至於蜀都
耆老大夫縉紳先生之徒二十有七人儼然造焉
辭畢進曰蓋聞天子之牧四彝也其義羈縻勿絕
而已今罷三郡之士通夜郎之塗三年於茲而功
不竟士卒勞倦萬民不贍今有按之以西彝百姓
力屈恐不能卒業此亦使者之累也竊爲左右患
之且夫邛笮西彝之與中國並也歷年滋多不可
記已仁者不以德來强者不以力并意者其殆不
可乎今割齊民以附外彝敝所恃以事無用鄙人
固陋不識所謂使者曰烏謂此乎必若所云則是
蜀不變服而巴不化俗也僕嘗惡聞若說然斯事
體大固非觀者之所覲也余之行急其詳不可得
聞已請爲大夫粗陳其畧蓋世必有非常之人然

後有非常之事有非常之事然後有非常之功夫
非常者固常人之所異也故曰非常之原黎民懼
焉及臻厥成天下晏如也昔者洪水沸出汜濫衍
溢民人升降移徙崎嶇而不安夏后氏感之乃涇
洪塞源決江疏河灑沉澹災東歸之於海而天下
永寧當斯之勤豈惟民哉心煩於慮而身親其勞
躬胝無服膚不生毛故休烈顯乎無窮聲稱浹乎
來茲且夫賢君之踐位也豈特委瑣蹀躞拘文牽
俗修誦習傳當世取說云爾哉必將崇論竝議創

業垂統爲萬世規故馳騫乎兼容並包而勤思乎
參天貳地且詩不云乎普天之下莫非王土率土
之濱莫非王臣是以六合之內八方之外浸淫衍
溢懷生之物有不浸潤於澤者賢君耻之今封疆
之內冠帶之倫咸獲嘉祉靡有關遺矣而遠方殊
俗之國遼絕異黨之域舟車不通人跡罕至政教
未加流風猶微內之則時犯義侵禮於邊境外之
則邪行橫作放殺其上君臣易位尊卑失序父老
不辜幼孤爲孥係縲號泣內嚮而怨日蓋聞中國

有至仁焉德洋恩普物靡不得其所今獨曷爲遺
已舉踵思慕若枯旱之望雨矣夫爲之垂涕况乎
上聖又焉能已故北出師以討強寇南馳使以銷
勁越四面風德二方之君鱗集仰流願得受號者
以億計故乃關沫若微泮河鏤靈山梁孫原創道
德之塗垂仁義之統將博恩廣施遠撫長駕使疏
逸不閉習爽闇昧得耀乎光明以偃甲兵於此而
息討伐於彼遐邇一體中外禔福不亦康乎夫拯
民於沉溺奉至尊之休德及衰世之陵彝繼周氏
之絕業天子之亟務也百姓雖勞又惡可以已乎
哉且夫王者固未有不始於憂勤而終於佚樂者
也然則受命之符合在於此方將增太山之封加
梁父之事鳴和鸞揚樂頌上威五下登三觀者未
觀旨聽者未聞音猶鶴鵬已翔乎寥廓之宇而羅
者猶視乎藪澤悲夫於是諸大夫茫然喪其所懷
來失厥所以進喟然竝稱曰允哉漢德此鄙人之
所願聞也百姓雖勞請以身先之敝罔靡徙遷延
而辭退

唐

報南詔坦綽書

節度使 牛叢

竊以詔國自爲背叛積有歲年乃祖出於六詔之
微非是西彝之長禹會塗山之日不得預萬國之
名舜受方岳之時不獲見五年之幸我大唐德宗
皇帝仁沾動植信及豚魚子育兆民君臨四海憫
其傾誠向化率屬來王遂總諸蠻令歸君長仍各
詔國永順唐儀賜孔子之詩書頒周公之禮樂數
年之後藹有華風變濁穢蠻貊之邦爲馨香禮樂

之域豈期後嗣罔效忠誠累肆猖狂頗爲妖孽自
四五年來侵凌我疆土圍逼我城隍蓋以始務舍
容不虞搆突遂令兇醜以害生靈况乃毗橋喪師
淹江敗績夫何今日不改前非妄設奸欺詐言朝
覲輒舉螳螂之臂大興豺豕之心仍構狂詞且先
代帝王之治也豈嘗外蠻貊以雜之是必天怒鬼
誅殞身喪國因其襄實示彼誠懇况國分大小小
當事大豈有興動蠻師甲兵侵凌天子藩屏必數
盡殄滅之秋不然何以不恤其民妄動於衆一旦

天子赫怒諸侯會兵長驅渡瀘之師深入鐵柱之境必不更七擒七縱卽須剪蔓除根當此之時後悔無及坦綽今旣離彼巢穴犯我封圻當道已排比戰場點齟戈甲雄師十萬驍騎五千卽遂鼓行併令擒戮所差王保誠四十人送書竝已囚繫候於軍前用以釁鼓今發遣鄭隴段蠻遷二人特此報書

貽書臯書

雲南王

異牟尋

異牟尋世爲唐臣曩緣張虔陀志在吞海中使皆

至不爲澄雪舉部惶窘得生異計鮮于仲通比年舉兵故口新無由代祖棄背吐蕃欺孤背約神川都督論訥舌使浪人利羅式眩惑部姓發兵無時今十二年此一忍也天禍蕃廷降釁蕭牆太子弟兄流竄近臣橫汗皆尙結贊陰計以行屠害平日功臣無一二在訥舌等皆冊封王小國奏請不令上達此二忍也又遣納舌逼城于鄙弊邑不堪利羅式私取重賞部落皆驚此三忍也又利羅式罵使者曰臧子之將非我其誰子所富當爲我有此

四忍也今吐蕃委利羅式甲士六十侍衛因知懷惡不謬此一難忍也吐蕃陽毒野心輒懷搏噬有如媼生實汗辱先人辜負部落此二難忍也往退渾王爲吐蕃所害孤遺受欺西山女王見奪其位拓拔首領並蒙誅僕固志忠身亦喪亡每慮一朝亦被此禍此三難忍也往朝廷降使招撫情心無二詔函信節皆送蕃廷雖知中夏至仁業爲蕃臣吞聲無訴此四難忍也會祖有寵先帝後嗣率蒙襲王人知禮樂本唐風化吐蕃詐給百情懷惡相戚異牟尋願竭誠日新歸欵天子請戍劍南西山涇原等州安西鎮守揚兵四臨委回鶻諸國所在侵掠使吐蕃勢分力散不能爲疆此西南隅不煩大兵可以立功云

明

與鶴慶知府董賜書

親國公傅友德

大丈夫之處世也當磊磊落落出羣不羈然後能拔淤泥脫塵埃策勲當時垂名竹帛飄然而立於凡品之上亦猶騏驥伏櫪鸞鳳棲柵其始也雖與

駑駘同秦雞鶩共食無異於彼一旦遇伯樂振羽
翻終能馳騁於長途而翱翔於雲表也昆明古西
南彝去中華萬餘里因元之季天下鼎沸天朝受
命海內維新梁邸以元餘孽保據其地弗遵聲教
者十有四載天兵南下問罪討惡余恭弔伐之任
受鉞專征辛酉冬戰於曲靖之墟大破其衆擒其
總戎轉開烏撒遂平諸部梁邸計窮出奔而殞其
他豪傑或降或叛或就誅戮或被囚執者相半矣
于時足下以前安寧知州來見于稠人之中余目
而異焉遂加盼睐仍試以事繼而招降撫順綏輯
遺黎頗著誠欵達官貴人咸稱其能於是乃復其
任使保妻子焉壬戌春烏蠻構釁流毒邊境余與
諸將分兵致討時有大理起到土官高生等悉寓
桂城欲俟途平俾令朝覲而閩帥不仁失於撫字
致令驚疑接踵而遁及至本土遂爲仇讎舉兵相
向攻我城邑殺我吏士日甚一日轉加昌熾閩帥
莫制矣足下介在羣兇之中確守歲寒之節斥其
奸謀誅其來使獨挾妻孥冒刃入滇復與列較分

守城堡投放矢石城之所以存者與有功也副將軍西平侯聞難來赴誅鋤芟刈羣蠻復定余至滇西平侯備述其事余甚嘉之然此豈古人所謂不遇盤根錯節何以別利器歟抑士之始遇驥之始知歟余征大理足下又率鄉曲子弟五百餘人爲師前道招徠劍麗降伏西蕃威聲頗振有功必報古之道也矣新舊爲乃奏天子授足下以專城之任任足下以牧守之官保障大理爲滇外戶恩亦至矣榮亦甚矣此正持盈守成之時也可不勉歟

古人有贈人以言余深慕之余雖武臣數聽教于君子矣足下其宜訓兵務農嚴紀律著恩威毋暴橫而欺良毋縱驕逸而墮前功上下相承共寧斯土以副國朝任用之意策勲垂名不其偉歟茲因師旋畱言以誠惟足下勉之

露布

唐

姚州道破諾沒弄楊虔露布

駱賓王

臣聞北極列象六合奉天子之尊南面乘乾一統

成聖人之業故塗山萬國誅後至者防風毋蒲一
戎緩前禽者就日伏惟陛下登翠嬀以握圖居紫
微而正象立功不宰混太始以凝神至道無名佇
華胥而得夢闡文教以清中夏崇武功以制九彝
反踵穿胸之域襲冠帶以來王奇肱僭耳之會奉
正朔而請吏逆賊某淨竹遺胤沈木餘苗邑殊禮
義之鄉人習貪殘之性日者皇明廣燭帝道遐融
輒敢亂我天常變九隆而背誕負其地險携七部
以稽誅騷亂邊疆破穀州郡用是三門授律長驅
無戰之師五月渡瀘深入不毛之地岡巒千里西
通大荒之郊溪谷萬重南極炎洲之境聳喬林而
挿月陰靈有假道之標拔崇巖以隱天陽鳥無迴
翼之地峯危束馬路絕懸車賊據臨代之形重建
瓴之勢徵風召雨蜻起蜂飛驅集種以挺災封狐
千里鹹沈黎而作孽雄虺九頭臣始廣布皇恩恭
宣帝澤申之以安撫曉之以存亡信重蠻陬無負
黃龍之約賞隆漢爵不渝白馬之盟地接冉駝詞
屢殫于諭蜀俗通槃瓠聲不輟于吠堯臣遣某某

街枚遠襲卷甲前驅偃危旆而設前兵疑從天落
乘間道而掩不備若出地中彎弧而克黨土崩舉
刃而妖徒瓦解雖危茗沸鼎未窮梟首之誅救死
挾傷猶致析骸之爨玄雲結陣影密西郊赤莖揮
鋒氣衝南斗颺塵埃而布地白日爲之晝昏掃氛
侵以稽天滄溟爲之晦色兵交刃接鳥散魚驚自
卯及申追奔逐北斬首千餘級轉戰三十里激流
膏而爲泉似變襄弘之血委亂骸而擠壑若泛鼉
靈之屍旣而照盡高春雲昏一夜賊乃收集餘衆

保據高巖臣度彼遊魂慮其宵遁使三軍齊進四
面合圍一鼓先登賞必懸于芳餌九攻按律罪無
赦于嚴誅五部雄才三河俠少或生居燕地尤工
卽墨之圍或家本秦人早習昆明之戰戰踰百里
嘗歷三朝前後生擒四千餘人斬首五千餘級諾
沒弄揚虔桺等頌元行陣懸首旌門蒙賧和舍等
委衆奔馳脫身挺險昔魏臣賦蜀徒聞蒟醬之奇
漢使開邛纔通竹杖之利豈若膺紫泥而弔伐指
場微以臨戎一戰而孟獲成擒再舉而哀牢授首

斯蓋皇威遠暢廟略遐宣奉玄猷以配天徒知帝力掩皇輿而闡地豈曰臣功不勝慶快之至謹奉表以聞

破蒙賧露布

駱賓王

臣聞七緯經天星墟分張翼之野八統紀地炎洲限建木之鄉西距大秦襍金行而布氣南通交趾枕銅柱以爲鄰俗帶自狼人習貪殘之性河淪赤虺川多風雨之妖水積炎光山涵毒霧竹浮三節肇興化域之源木化九隆頗作中國之患年將千

禩代歷百王鄭純之化不追孟獲之風愈扇二年渡衆徒聞定管之譏五月出師未息渡瀘之役伏維皇帝陛下祥螭戴玉拓地軸以登皇道契寢繩掩天紘而踐帝玄雲入戶纂靈瑞于丹陵綠錯升壇薦禎圖于翠渚六合照臨之地候月歸琛大鑪覆載之間占風納書蠹茲蠻貊敢亂天常橫赤標以疏疆背朱提而設險山林萬仞巖邑六重望秦阜以相傾峻陵失四塞之阻對梁山而錯峙劔門成一簣之峯不知玉弩垂芒汙水無九嬰之珍瑤

階舞銃洞庭有三苗之墟臣等自招乘候順秋帝以揚旌絳節臨邊遲夜即以礪劍雲開雋穴旆轉邛門峻坂九折之危盡忘襟帶滇池滿江之固曾屬藩籬惟逆賊設蒙賧等未革狼心仍懷承突陸梁放命旅拒安城地接祠雞竟無希于改旦山多神鹿終未見于擇音徒開三面之恩逾肆九頭之暴鳩集餘衆蟻結覓徒偕耳椎髻之徒千里霧合鑿齒雕題之孽一呼雲屯於是三略訓兵五申誓衆先登陷敵無遺大樹之功後拒亂行必致曲梁之罰楚人三戶蜀郡五丁氣擁玄雲精貫白日沸殘息于層峰更切守陴之哭積員顛于重阜殆成京觀之封于是乘利追奔因機深入困獸猶鬪如戰廩君之覓窮鳥尚飛似驚杜宇之魄僵屍蔽野臨赤坂而非遙流血灑途視丹微以何遠首領和舍等並計窮力屈面縛軍門寬其萬死之誅弘以再生之路惟蒙賧脫身挺險負命窮山顧巢穴而匪依迺晷漏而何幾况妖徒革面徼外非復他人部落離心舟中皆爲敵國瞻言梟首指日爲期凡

雲南通志 卷之二十九
在歸降隨事招撫

破吐蕃露布

韋臯

劍南西川節度使同中書門下平章事臣臯等言
臣聞兵應者勝義者王師直爲壯曲爲老多助之
至四極爰騁貞觀則同羅擊延陀開元則九姓殄
默啜日商莫不來享犯漢雖遠必誅德鳳翔虜河
源武節愴虜月骨率寧人之有指先元戎之啓行
用信威光祖宗不以賊遺君父恭惟皇帝陛下宣
昭義問救寧武功續八葉之鴻圖奮四征之雄畧

懷柔鳴鎗侵沱稟仰太和翦鯨鯢清郊原掃除羣
穢玉猶允塞我武惟揚奇幹善坊各修貢職條枝
若木咸順指令邈積石之遐陬有吐蕃之醜類侵
敗王畧倍奸齊盟乘邊將之騁兵瞰戎亭之虛候
爲蛇豕食上國盡盜河湟帥蝥賊搖我疆再驚畿
甸騎盭敢於深入鑿蹕至於親屯擗然授兵協以
謀我尚納汗而舍垢姑通使以結和清水之盟未
乾好時之師已聚指涇靈而徼賂閤鹽夏以擣虛
彝德無厭弗悔衽金之甌楚氛甚惡輒興裹甲之

謀蠢爾爲讎整居匪茹維時南詔慕化中朝先零之質諸羗雖嘗并力康人之率百濮罔不離心顛顛於邊受命於吏燕貉輸致騎之勤晉戎成犄角之勢彼旣失鐵橋之險我遂克峩和之鄂盍竄匿於龍荒復虔劉於麟塞戎我守將墮我隄隍修戈矛與同讎靡室家不遑處臣等請奮其旅以殲乃讎鳳翔振武靈武之騎獵其西邠寧太原涇原之兵震其北率山南熊羆之較暨東川羆虎之師烏蠻撓其腹心回鶻擣其肝腋衆素飽矣壹大治之諸將陳泊等統五萬軍出十一道濟師西顛之半策勲北陸之初盪平七城斬馘萬級獲鎧械十五萬計燔堡壘百七十餘遂賈勇而圍昆明將決勝而定青海僞東境五節度大使論莽熱釋朔方之衆援維州之城九攻九却之計窮七縱七擒之威速連連執訊矯矯獻囚不然我薪而自焚有如破竹之立解拂廬魚潰甌脫兔奔谷靜山空有就焉耆之僂區殫域滅汭聞智盛之降斯皆廟謨淵深神斷天造明見萬里運奇掌上之兵守在四彝制

勝目中之賊勒功滇池之柱植表赤嶺之碑一怒安
民文之勇也三軍用命克何力焉臣等承帝之明
敵王所愾開遠門謁候坐收西極之舊封紫薇殿
受俘重覩崑丘之茂績臣等無任慶快激切屏營
之至謹遣某官奏露布以聞

銘

明

銅漏銘

布政張統

雲南古西南彝地勢既偏晷度必差故觀天之器
當極精緻則民事早晚所關始免疑滯更譙銅漏
先總兵官黔寧昭靖王屢嘗致意而工不稱事嗣
侯襲總方面既得良冶遂繼先志克成茲漏銘曰
羲和授時以象觀天天有二曜與天周旋太陽主
晝太陰主夜盈縮永短寒暑代謝何以則之置此
嘉量水注箭浮時乃無妄勿輕秒末歲功所起差
之毫釐謬以千里支干縱橫陰陽消息天人昭合
視此爲則四民之業各守程矩利爾出往安爾寢
處東作西成不愆不忘庶積威熙家用平康藩臣

施政能知其要九功斯勸茲器之妙

昆明毛氏三節銘

余承勛

眉山文博毛東鎮一日持其家三節卷過余余讀而嘆曰節一也所以成其節之名各有專稱焉如劉母撫孤及孫保有毛祀謂之慈節可也魏母孀居誓死以成姑志謂之孝節可也四世至給諫琢庵公立朝正色抗疏死諫謂之忠節可也嗚呼慈孝忠節國之紀也有一於此亦足風世况兼四美而萃之一門乎乃銘曰惟坤貞順抱一體元剛德

資始象此淑媛皎皎雙節風教大原柔嘉維則士行攸敦曠代罕匹萃於一門曰劉與魏撫子若孫中流砥柱狂瀾載奔昧谷餞景赤曦載掀徽音克嗣毛祀以存皇天錫類昌發後昆有曰司諫抗疏叩關犯顏議禮流聲禁垣有曰文博師道孔尊譚經振鐸鏘鏘魯璠衍澤未艾降祉益繁匪先曷啓濬委宗源弘風訓世彤管載言表闕表墓迓寵丘園敢告司諫以慰忠魂勒銘三節不崩不騫

咸陽王廟銘

王臣

世之廟食垂萬世而不絕者不於功必於德德難知而功易見其宜祀之均也昔羊祜杜預之守襄陽也祜以德預以功李水文翁之治蜀也水以功翁以德見諸事業之大感於人心之深皆卓乎莫之尙已然其所優劣軒輊亦自較然矣乎惟存於內者真行於外者義巍然炳然合二者而有之是其所以奮百代而超千祀蓋有不隨死而磨滅者矣若有元行中書省平章事賽公咸陽王其殆庶幾乎王本諱贍思丁爲烏孫國師之後其國言賽典赤猶華言貴族也至元甲戌王奉詔鎮諸彝籙遂來滇南舉賢用能分職理務下車之初以興學育才爲先建文學歲祀於三丁收置載籍以示學者抵大理詢父老諸生利國便民之要博採而力行之政聲大著南荒之人翕然向化由是省徭役收散于恤鰥寡備水旱優禮賢士汰去冗員置屯田以便攻守薄稅賦以廣行旅饑寒者衣食之流散者撫字之凡興利除害之事靡所不究又建省堂治驛館修橋梁興市井百爲之備而民不知其

勞十二年冬會羅槃甸叛王往征之諸將請攻王
不許降卒有乘城進攻者王命縛之羅槃王聞之
遂舉國降諸蠻長各獻金幣奔走若不暇王遣郎
中楊璉諭迤西和泥諸部皆望風而靡比卒安南
王遣使齊經爲文致祭百姓號泣震野已乃請諸
朝贈守仁佐運安遠濟美功臣太師開府儀同三
司上柱國咸陽王諡忠惠明有天下雲南入職方
王仍廟食焉因記而銘之銘曰王昔奉命治西秦
陶民以義噓以仁甘棠餘愛千家春遺黎口碑同
琰珉帝道南滇化邊氓詩書禮樂澆漓醇邦人戴
之父母親南方信之著龜神挺乎廟謨必臣鄰森
乎功烈羅星辰大羊躡伏敢狺狺春陽發育皆收
收曾王膽落拜望塵願爲赤子貢國珍表德旌勛
優詔頻公搢躬圭儼冠紳鐘喧鼓考邊豆陳諸侯
佩玉來精禋王執玉鞭騎蒼麟龍旂獸盾千百人
早施澍澤無邊垠疾應禱事無呻吟王之博惠伴
化鈞王之英爽如星辰我歌樂章薦溪蘋願王世
世庇滇人

恭肅嚴公墓誌銘

大學士王錫爵

今上萬曆中大臣之以清德著望受天子特達知所拔擢待遇皆異等而未竟其用以死者海內蓋有三公諸城丘簡肅公擢瓊州海忠介公瑞與今昆明嚴恭肅公清先是嚴公謝太宰事歸上數問閣臣嚴尚書病愈否會本兵缺則特旨詔補公如楊襄毅故事又特使使者馳傳趣公行又數問閣臣嚴尚書何時來已公疏至具言臣實病且廢不勝首公私念以負上惟上哀察上不得已停筆欲署其奏久之方許比越歲上優禮歸老重臣又首晉公太子少保給廩米輿夫無何訃聞上若曰是惟子萬里親臣贈卹故事外宜有特加於是閣臣議端僖恭肅二諡以請上又特旨點用今諡其終始注眷殷繁款篤尤兩公所未及云公字直甫號寅所其先五代祖名子敬者自浙之嘉興徙居滇祖暘父春塢公缺以公貴得累贈至資政大夫刑部尚書祖母董氏母奈氏俱夫人奈夫人生四子公最少而咄咄奇悟鄉先達光祿施公昱擇婿得

公以女歸之嘉靖癸卯舉於鄉明年成進士除富順尹富順故劇邑或以調公此未淬之劍而輕斬蛟斷犀耶公謹謝曰小子何敢抑余劍也乃方在治中惟工之所鑄而擇利可乎至則能聲犬騰以救荒課爲天下最丁毋憂後除勘鄆其治如故操尋召入爲工部屯田司主事歷員外郎郎中督修外城及九陵皆斤斤謹出納侵牟吏膠手所省費以巨萬己工成當叙陞公辭不受受加俸丁父憂復除兵部車駕車駕王行郵政以清強敢任怨聞坐忤出知保定府會歲旱多盜公政先保民歲既漸熟乃具爲條教劇俗飭蠹犁然有理故事三輔郡歲籍民充京師庫役公議罷之至今稱便居保定三年課復最歷陞易州兵備副使陝西叅政四川按察使卽其地轉右布使使所至自撫按特舉及兩京臺諫會舉不下數十疏隆慶戊辰擢都察院右僉都御史巡撫貴州尋改四川公故川吏知其民所疾苦乃具籍川課之當輸京者議割二十萬金就近改給陝西軍餉罷郡縣卒之團操成都

優民者貢番入邊則爲定限額數額外不得浮一人他約束一切以惠利爲本而痛持豪家悍吏以法以是士大夫譽誹常參半而內江趙文肅公獨深知之會有以流盜誑公當落職趙公力爭得予告候調及後五年起督鴈門關不果改貴州入爲南大理寺卿尋改北歷刑部吏部右侍郎復自吏部陞刑部尙書上之知公自其在刑部能執法不訛權勢始旣柄用典銓則日夜討故事論官材丞掾以下皆親爲標署楊遵彥之默識黃欠公之至精不能絕也中外吏師其蕪儉直曠之間幾無一

跡上孳孳以太平屬公且未艾而公病歸矣歸之日遣使慰勞仍賜馳傳以萬曆庚寅年六月二十八日薨於家距其生嘉靖甲申年四月十八日得壽六十有七公性檢厲勤於事其操行嚴於趨舍辭受尤凜凜所居官身自與僮僕食麤衣敝蕭然也橐中裝雖圖書琴鶴不取諸人蜀王慕公使使致扇餌微餉而不受初拜尙書貧不能具服色束素屣帶以朝其輩類或指戲之公釋褐時玳瑁七

品帶故在耶公笑曰不然夫犀帶不裝金安知非
玉吾顧恐難爲上耳蓋公之內行修潔與海丘二
公畧同而二公喜谿刻標異稍闇於大體乃公獨
薰然長者色溫氣和人無賢不肖貴賤皆禮接之
其亭法處議本人情計久遠無崖岸峻物之行謹
咋抵掌之談以故明主眷遇尤渥而海內至今稱
大人之能安國家鎮雅俗者必首公云銘曰公起
滇南萬里遇主不介而親其惟德舉試吏一同爲
郎再考環轍方維頌者交道中丞之節于蜀于黔
斤斤其明濯濯其蕪入典法臺不軌三尺以晉冢
卿式是百辟胡威之清惟畏人知蘓章疆切以忠
見思古社稷臣待公屈指千載遭遇未究遐祉鬱
乎高山司空取榮埋石其墟載以嘉名曰惟帝賚
曰允師錫尙俾來許仰止無斁

自銘并韓宜可銘

王奎

洪武間景章任山西叅政宜可山西布政無何俱
以累謫戍臨安王嘗謀於韓曰吾二人自首相弔
以至於今天將崇茲土爲吾堂若封歟不豫銘之

懼世之弗自於道又懼道之弗自於志也生名奎
字景章太原生自號括之松楊人銘曰箕也不可
以簸揚斗也不可以挹酒漿祇適其逢而繫其庸
不規而方惟秉以常將殞質而連喪抑乘矢而耀
若又何必詭譎而較其短長徵以銘章繁彼之藏
轉作而言曰公豫自銘不豫吾銘可乎宜可吾名
伯時吾字號五雲越之會稽人與公同出處也公
乃銘之曰惟韓之原本於姬國以爲世愜鴻基宋
績肇啓系相琦二玉繩繩以丕緒歷元不競世弗
廢先生懋德執不倚摘茲秉忠神其機致君有道
沛以施載厲載棘氣不萎達生知命壽乃彝我銘
其藏永厥期 都御史王啓讀王韓二銘系以詩
曰世弗自焉用銘天將崇茲土死欲畱其名道別
各有成男兒當自明君不見齊有太公望投竿遇
王依周葬又不見晉有陶元亮棄官不仕自作狀
我欲滅迹返太初滇陽婺女皆吾居風塵南北揀
不得不作賢臣頌亦無封禪書

太元宮銘

李元陽

雲南通志 卷之二十九
鶴山四迴元氣結晞光洞開氛祲截太素神僧入
其暇飛錫一卓洪滔竭至今后土雷靈穴竭來遺
甕頽愚媒膏癘弗修祈饗絕霄雷歲有爲民巖誰
其顛天聲哽咽周侯欲滴心頭血構宮安聖天神
列樓閣蒼然冠嶽巢勝事難成勢中輟仁哉鄰伯
完其缺叅贊江山賴賢哲兩侯相繼成峻烈靈祇
垂鑒應無警時有卿雲含藻稅氣候調和暘雨節
疆場人民無天折黍稷年年奉權悅金堂玉室常
芳潔

本朝

王端簡墓表

大學士

李

壽

高陽

康熙拾叁年玖月

予告光祿大夫太子太保兵部尚書加一級仍
支一品俸祿王公自金陵上疏稱臣疾篤且日
夕先朝露思無以報

國恩惓惓以敬

天法

祖圖治勤民入告

雲南通志

卷之二十九

藝文七

雲百通元 卷之二十一 天子覽奏降

俞旨慰問越數日有司以公薨聞於朝

天子感悼詔議卹典 賜祭 賜葬又

特賜文諡諡曰端簡其子工部員外郎瑜以康熙
拾肆年拾貳月己丑葬公於江南江寧府句容
縣茅山百培墩之麓先期乞銘於予予與公同
朝久素知公生平大節不敢以不文辭乃述公
世族官爵及功業行誼言論之尤著者而誌於
墓焉公諱弘祚字懋自號玉銘以思其先大夫

又號思齊先世陝西二原人端毅公諱恕康僖
公諱承裕相繼爲明名臣成化間端毅公從子
順欽公始家於滇南之永昌公會祖良弼公諱
延州祖封文林郎贈奉政大夫崇正公諱信父
瞻雲公諱國治萬曆癸卯舉於鄉起家新繁令
遷德安郡丞歷官刑部郎中至政聲茂著迄
今崇祀名宦鄉賢自曾祖而下皆以公貴贈光
祿大夫太子太保戶部尚書曾祖母任氏祖母
吳氏母鄭氏皆贈一品夫人公敏達弘碩自諸

生時卽以經濟爲學庚午登賢書丁丑副南宮
歷官戶部郎中督餉大同

本朝定鼎擢公尙嵐兵備道時宣大總督吳公寧
昌知公賢疏請畱任經理餉務報可順治二年
以才能

召至京仍官戶部郎中公博通典故尤善強記
於天下州郡錢穀之數一見能識不忘時政府
圖籍散軼賦役繁滄司農特疏留公久任纂修
賦役全書加太僕寺少卿六年加太僕寺正卿
拾年擢戶部右侍郎拾伍年

特晉戶部尙書加太子少保拾陸年加太子太保
拾捌年請假回滇經營塋事康熙貳年還

朝補刑部尙書未幾復調戶部尙書公在農曹將
參拾載殫精專力周咨博訪以定一代賦法酌
盈縮之平權損益之當釐正夙弊興復舊章凡
天啓崇禎末年繁苛之令悉捐除之土田戶賦
徭役一以萬曆年間爲準書旣成上之

世祖皇帝其大指在懲墨吏之橫徵杜貪胥之私派且

使

皇上知閭閻賦役之艱難而起節儉之思使小民知
版籍徵輸之纖悉而絕侵漁之擾裕國紓民有
典有則

世祖御製勅諭載在簡端永遵爲式此我

國家憲章之大而公之首爲裁定者也故自卽署
不數年而至大司農蓋

世祖特以計部任之矣一日御南苑 召詢天下錢穀
出入之數八條對獨得要領多所敷陳

世祖嘉悅久之

本朝數拾年來內外翕然稱大司農者必曰王公
公洞達天下利病奏牘不下數十謂安民生在
首嚴私派講強兵則首嚴冒餉可謂要言不煩
又云水旱災傷望恩甚切有司查核經年始報
今後一遇報災卽當疏請又云今日民生不苦
於正供而苦於雜派乞

諭督撫加意廉察時以雲省初入版圖疏請闢賓
興以廣文教慎署員以安民生又謹列十條大

指以設重鎮稽丁田恤士紳撫土司寬新制爲至要又陳五事謂司道宜久任州縣宜部選投誠宜解散荒殘宜軫恤爐座宜多設皆切中時務疏入悉見施行他如撤八旗止加練餉諸議難以枚舉公遇事沉毅有識廟堂有大謀大議必正色抗言務求至當不隨衆論爲可否康熙四年以星變地震求言公疏曰星辰有定數今異星忽見則天失其常矣坤道主靜今忽爾震動則地失其常矣六卿各有定制今更易太煩

則人事失其常矣挽回天地之變首在幸循人事之常中外以爲各言漕粟自通倉運入京倉車輛之費以萬計議者欲於水次命各旗支給可省

朝廷輓輸之力公曰仍宜令支給於京倉雖有糶者顆粒皆在都下此昔人根本之深計不當以小利而變法公之明於大計類如此會有王裁州縣存留之議者與公議不合又欲變漕糧官運法爲民運紛更舊制公固爭之不能得遂以

兩議具疏皆悉如公請未幾以失察吏胥報罷

天子見公老成忠恪念

世祖皇帝特勅公纂修賦役全書委任優崇勞績素著
詔留公京師尋補兵部尚書公在中樞運籌帷幄
悉中機宜均提鎮內外之陞定分缺選授之法
請設川湖總督彈壓之寄尤公未雨之綢繆也
九年以年邁乞休疏再上始得請

天子嘉公舊勞

特賜溫綸馳驛給俸以示恩眷都人士大夫祖餞

青門作詩歌榮公之行比於二疏有加焉南歸

感疾寓居金陵屢疏辭俸

天子優詔不允其請去年疾革猶伏枕草遺疏謝

上依戀彌切其忠懇不忘始終之義可以無愧古大

臣之風矣公性純孝奉瞻雲公及鄭太夫人教

惟謹能以清白世其家瞻雲公鄭太夫人歿於

九隆逾數年滇省始入版圖訃音至公哀號躡

踊慟不欲生凡三疏請回籍終制詞益懇切是

時

世祖方倚公典掌計務 眷注慰留者再四不獲已勉

以墨纒視事拾捌年請歸營窀窆築廬墓側盡

哀盡禮

天子優以卹典公父母及元配周夫人各予祭塋人

子顯榮其親者可謂至矣而終天之戚垂暮不

已居金陵猶手輯永思錄數卷至今讀之尙覺

淚盈盈從紙上出也友愛周至視猶子璋如已

子順治拾捌年俾承公廕家訓嚴肅皆有法度

子瑜官京師手書以清慎勤誠訓之歲不下數

拾紙用能克紹家學歸滇之日修學宮立義塾

贍宗族周貧乏爲善日不暇給公與人忠信誠

篤而泰山喬嶽之概溢於言表溫恭嚴恪終日

無懈讀書至老不衰尤精於鑿援順治拾貳年

參月充

殿試讀卷官以史諱大成文首薦果傳臚第一三

充讀卷所取均屬賢才康熙陸年會試膺

命大主考取黃仍緒等百伍拾人是科號稱得士

通達大禮明而能斷立法垂憲爲國之紀膺

兩朝之異數作邦家之元老遺榮引退天格平康
三事如公可謂備矣公生於明萬曆癸卯年參
月初伍日辰時卒於

皇清康熙甲寅年九月貳拾貳日未時享年柒拾有

貳元配周氏

誥贈一品夫人前吏部郎中諱良材女次趙氏胡
氏子四琦官監生娶劉氏庠生諱士麟女珣廕
生娶朱氏前刑部主事諱揚先女珣逝瑜工部
營繕清吏司員外郎娶馮氏明經諱運新女繼

娶焦氏太史諱竝孫女副郭氏琦珣瑜俱嫡出
瑄廕生趙出娶蔣氏季蕙丹陽學博諱士璋女
女三長嫡出適前吏部主事胡諱璇子騰駿駿
逝次胡出適前刑部主事朱諱揚先子庠生緹
次趙出字都察院右副都御史孫諱建宗子珏
女早逝姪璋原任山西澤州知州娶汪氏庠生
諱繼元女孫五世淳廩生娶馮氏辛丑補廩子
科舉人諱德禎女琦生世澄廕生娶李氏明經
諱滋美女世瀚廩生娶沈氏明經諱昌賢女俱

珣生世清世溥俱幼未聘瑜生孫女四一適前
 江西寧都縣知縣張諱士俊孫庠生希孟琦生
 一適癸酉科舉人吳諱瑞徵孫庠生廻迪遊珣
 生二未字俱幼瑜生姪孫世泰紹曾承曾俱璋
 生曾孫福蔭世澄生俱幼未聘公以

天子命賜塋極哀榮禮瑜謹於康熙拾肆年拾貳月
 初捌日申時塋公於句容縣茅山百培墩之陽
 巳山亥向古人云既忠且孝法宜銘如公者洵
 無愧於斯矣銘曰

景運麗鴻挺生鉅公翼我

世祖六服來同賦簡役平公秉其成三壤既則九式維
 均六官之長公柄其三仁育義振山負海涵瞻
 公之度精金美玉其言侃侃其容穆穆成功而
 歸不激不隨進退有道卷舒以時飲和令終返
 於幽宅

天子曰咨錫諡表德寵命載申塋公高原康保無疆
 以裕後昆

以補遺缺

天子曰谷諱滿矣諱謙命璋中整公青思兼羽燕歸

依幽子

賦不期不測也故不敵尊禮思存燭味令其

公之更清金美其其首領於其治變變變而

內六官之員公附其立言有兼君山貨通通而

世厥六親來同燠爾對平公乘其其立言有兼君山貨通通而

清與顯顯其志與公真好

